

Eprêw Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pê Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarēnh rax nê tanhmã Jejus jarēnh to.

Nê mẽ hkwÿjaja hkwÿjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanār prãm xàj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tĩrtũm nhōrkwÿ kaàkre hã kagà hto. Nê kaxkwa kamã ōrkwÿ mexja nhũm tanhmã hã kagà hto nê mex o ōrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

¹ Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepêm Tĩrtũm na pre mẽ panhīgêtjê hwÿr ÿ hã kapêr jarēnh o ri mẽ pa xwÿnhjê rē nhũm mẽ xatã

mê kãm kapêr jarênh o ri mê hkôt pa. Ahpÿnhã tanhmã mê kãm kapêr to ho amnhĩrît o mê hkôt pa. Nhũm Tĩrtũm xatã mê hkanrêhã mê hkra nê mê htãmnhwÿjê hwÿr mê hkwÿjê rê nhũm mê kãm kapêr jarênh o ri mê hkôt pa. Nom mê kãm kapêr piitã harênh kurê kumrêx kêt nê. Na prem ãm hkwÿ pix jarê. Tã nhũm hpãnhã mê hkwÿjaja wantajê mÿr pê mê hwÿr mra nê axte mê kãm hkwÿ jarênh o ri pa. Jao ra mê kãm harênh jatur xãm mênh o mō. ²⁻³ Tã nhũm Tĩrtũm Kraja mê pahwÿr wrÿ nê mê pamã kapêr jarênh jatur xãm kumê. Kêp Tĩrtũm Kra jakamã te kot amnhĩ nhĩpêx pyrã nê pa. Urãk nê mex o mex. Nê wa hihtÿx xãja tipxi. Nê wa àhpumunh tÿxja mãânên tipxi. Jakamã mê pahte pano ho Tĩrtũm pumunh kêt tã Jejus pumunh pê te mê pahte Tĩrtũm pumunh pyrãk. Urãk nê kot amnhĩ to rax o mê pahpiitã mê pajakrenh par. Amnepê m kormã mêmōj kêt ri nhũm Jejus Tĩrtũm kukwak ri mêmōj piitã ho kator pa. Tã koja Tĩrtũm nhÿrmã kãm mêmōj piitã òr pa. Kaxkwa kamã mêmōj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mêmōja arĩ rãhãã. Na pre mê panê mê pahte amnhĩ tom-nuj piitã hpãnhã amnhĩrer par kaxyw mê panê ty. Hãmri akupÿm htĩr hãmri nê ma akupÿm kaxkwa hwÿr api. Tĩrtũm xihtÿx o hihtÿx xwÿnhja wÿr akupÿm api. Nê ò krĩ kamã upôk rũm pahĩ maati hkrĩ xã hã kuri hkrĩ ho hkrĩ. Nê ìhkô hã mê pahto amnhĩptàr rãhã ho hkrĩ.

Jejus mê Tĩrtũm kapêr o mê wrÿk xwÿnhjê jarênh

4-5 Nê Jesus kot amnhĩ to rax o Tĩrtũm kapêr o mẽ wryk xwỳnhjê jakrenh jakamã na pre ã Tĩrtũm kãm kapêr anê nê kãm:

Na ka amnhĩ to rax o mẽ kot ixkapêr o mẽ wryk xwỳnhjê jakre.

Mẽ kot inhmã tanhmã amnhĩ nhĩpêx to ho mẽ pa xwỳnh na mẽ.

No mẽ kurom apê Ixkra kumrêx jakamã amex o ate mẽmoj piitã hakrenh par.

Nê apê pika nhõ xwỳnhjê hwỳr ixte amênh mã xwỳnh na ka. Nà apê Ixkra kumrêx.

Kot paj jarãhã ixpê anhĩpêêxà hã mẽ piitã mẽ kãm amnhĩ to amnhĩrĩt. Pa na ixpê anhĩpêêxà.

Anhỹr o Kra Jesus mã kapêr. Na pre kapêr o mẽ wryk xwỳnhjê mã ã kapêr anhỹr kêt nê. Jesus mã pix mã ã kapêr anê.

6 Nê koja nhỹrmã akupỹn mẽ pahwỳr Kra mẽnh kaxyw hãmri nê kapêr o mẽ wryk xwỳnhjê mã kãm:

E ota Ixkrata. Ixkra kumrêx na. Kot amnhĩ to rax o mẽ piitã mẽ hakrenh par.

Jakamã kêr ka mẽ apiitã kutã arôrôk nê kãm mex o mex ã harê.

Anhỹr o mẽ kãm kapêr. 7 Nê kapêr o mẽ wryk xwỳnhjê na pre axtem tanhmã mẽ harênh to nê mẽ harênh o:

Ixkapêr o mẽ wryk xwỳnhjaja na pa hte nhỹhỹm mẽ kurê nhũm htem inhmar xà hkôt ma nhỹhỹm mra nê inhmã tanhmã amnhĩ nhĩpêx to.

Te ixte ma nhỹhỹm kôk nê kuwyja mẽnh nhũm ixkapêr kôt nhỹhỹm môrja pyrak.

Anhÿr o mẽ harẽ. ⁸ No ã Krata jarẽnh anhÿr kêt nẽ. Na pre tanhmã kãm kapẽr to nẽ amnhĩ pyrà nẽ kêp Tĩrtũm ã harẽ nẽ kãm:

Pa Tĩrtũm? E ka kot kaj mẽ ho amnhĩptàr rãhã ho akrĩ. Nẽ akatàt kôt mẽ ho amnhĩptà.

⁹ Koja mẽ tãm amnhĩ nhĩpêx ka ja hã mẽ omu nhũm ja amã mex nẽ.

No koja mẽ tanhmã amnhĩ tomnuj to ka ja hã mẽ omu nhũm ja apê omnuj nẽ. Mẽ kot tanhmã amnhĩ tomnuj to ho paja na omnuj tÿx.

Tã ate inhmã hprãm xà hkôt amnhĩ nhĩpêx jakamã na pa mẽ kaxyw axãm ka akĩnh kãm mẽ ho amnhĩptà.

Ixpê anhõ Tĩrtũm na pa ã amã ixkapẽr anẽ. Anẽ.

¹⁰ Hãmri nẽ kãm:

Pa Pahihti. Nà amnepêm kormã mẽmoj kêt ri na ka pre ixkukwak ri pika nẽ kaxkwa ho akato. ãm hãmri na ka pre ã amnhĩ nhĩpêx anẽ.

¹¹ Tã nom koja nhÿrmã hamẽ wa hapêx pa. ãm kaxipix kot kaj kurom arĩ arãhãã nẽ aa ajapêx kêt nẽ.

Kaxkwa nẽ pika koja wa nhÿrmã te ixkre hã pô htũm kot amnhĩ nhĩpêx pyræk.

¹² Kot kaj wa hipêx o te mẽ kot ixkre nê pô htũm mã hikranh par nẽ hpãnhã hã nyw janhôr pyræk.

Jao pika nẽ kaxkwa htũm o ajapêx pa nẽ hpãnhã nyw nhĩpêx. Kaxkwa nyw nhĩpêx nẽ pika nyw nhĩpêx.

Nom kot kaj pika nẽ kaxkwa tũmta pyrà nẽ aa awej nẽ axirerek kêt nẽ.

Kot kaj arĩ anyw nê axihtỳx rãhã apa ho apa nê aa ajapêx kêt nê. Arãhã atĩr tũm nê apa ho apa xwỳnh na ka.

¹³ E jar inhĩhkô hã nhỹ nê inhmã mẽ ho amnhĩptàr o akrĩ.

Kot paj mẽ kãm akurê xwỳnhjê pynênh pa nê man awỳr mẽ o mra nê anhĩhkram mẽ haxàr pa. Anê.

Ã na pre Tĩrtũmja Kra Jejus mã kapêr anê. No kapêr o mẽ wrỳk xwỳnhjê mã ã kapêr anhỹr kêt nê.

¹⁴ E kot paj hpãnhã ixprĩ hã mẽ amã Tĩrtũm kapêr o mẽ wrỳk xwỳnhjê jarê ka mẽ inhma. Tĩrtũm mã na htem tanhmã amnhĩ nhĩpêx to ho pa. Na hte nhỹrmã kuri mẽ htĩr tũm nê mẽ pa mã xwỳnhjê hwỳr mẽ kurê nhũm mẽ ma mẽ hwỳr wrỳ nê tanhmã mẽ ho ajuta hto ho pa. Na htem ã amnhĩ nhĩpêx anhỹr o pa.

2

Mẽ pahte Jejus kaga hkêt ã mẽ pamã karõ

¹ Tã ã Tĩrtũmja Kra kot amnhĩ to rax o kapêr o mẽ wrỳk xwỳnhjê jakrenh ã harênh kot anhỹr jakamã kwa kêr pu mẽ kapêr mar tỳx rãhã nê hkôt pix mã amnhĩ nhĩpêx o papa. Kot pu mẽ ho anhỹr kêt hãmri nê gaa nê hkaga. ² Na pre Tĩrtũm kapêr o mẽ wrỳk xwỳnhjaja amnepê mã mẽ panhĩgêjtjê hwỳr wrỳ nê Tĩrtũm nhỹ hã mẽ kot tanhmã amnhĩ nhĩpêx to ho pa hã mẽ kãm karõ nê ma akupỳm api. Nê katàt kôt ri mẽ kãm Tĩrtũm kapêr jarênh o pa. Hãmri nhũm mẽ kot hkôt amnhĩ nhĩpêx nê mar mex xwỳnhjaja nhũm mẽmoj mẽ kãm mex nê. No nhũm mẽ kot mar nê ãm mar xwỳnhjaja koja mẽmoj mẽ kêp omnuj nê. ³ Koja nhỹrmã mẽmoj mẽ kêp

omnuj tỳx kumrêx nhũm mẽ tee ri amnhĩ tã omu nẽ tee ri kêp amnhĩptàr prãm kaprỳ nẽ mex kêt nẽ pa. Nom mẽ kot Tĩrtũm kapêr mar tỳx xwỳnhjaja koja mẽmoj mẽ kãm mex o mex. Koja Tĩrtũm amnhĩ katut kôt mẽ kot amnhĩ tomnuj rẽn h pa nẽ axte kãm hamaxpêr kêt nhũm mẽ kuri htĩr tũm nẽ mex rãhã nẽ pa ho pa. Na pre Pahihti Jejus mẽ kot kapêr mar o kuhê xwỳnhjê kumrêx mã ã ja jarẽn h anẽ nẽ mẽ kãm:

—Nà kot kaj mẽ amnhĩ kaxyw inhmã ajamaxpêr nhũm Tĩrtũm ixtã mẽ apumu nẽ mẽ anê mẽ ate amnhĩ tomnuj piitã ho hapêx pa nẽ axte kãm hamaxpêr kêt nẽ. Anẽ.

Hãmri nhũm mẽ kot kapêr mar nẽ hkôt mẽ pa ho mẽ pa nẽ xwỳnhjaja mar tỳx nẽ amnhĩ xô ri mẽ pamã harẽn h o ri pa. Nẽ mẽ pamã:

—Nà ãm hãmri. Nà ã ja jarẽn h kot anhỹr. Anẽ.

⁴ Hãmri nẽ mẽ pamã aa mẽ pahte mẽmoj pumunh kêt kwỳ ho anhỹr o ri mẽ pahkôt pa. Tĩrtũm Karõ kot ja kaxyw mẽ ho mẽ àhpumunh tỳx jakamã nhũm mẽ ỹ hã ahpỳnhã tanhmã mẽ pamã amnhĩ nhĩpêx to ho pa. Mẽ pahte ja hã mẽ omunh nẽ kamã pano puma kaxyw. Nẽ ã mẽ pajamaxpêr anẽ nẽ pajamaxpêr o:

—Nà ãm hãmri na mẽ pamã ã Jejus jarẽn h anẽ nẽ ỹ hã ã amnhĩ nhĩpêx anhỹr o pa.

Anhỹr o pajamaxpêr kaxyw na prem ã mẽ pahkôt amnhĩ nhĩpêx anhỹr o pa.

*Mẽ pahpê Jejus tõ nẽ htõx ã mẽ pajarẽn h
Juãw 1.14; Rõmãn 8.3-4; Piripos 2.5-11; Korosẽ
2.9; Wam Juãw 4.2*

⁵ Nê na pre Tîrtûm amnhî kukamã tanhmã amnhî jarênh to nê nhÿrmã kot akupÿm mẽmoj piitã ho nyw nê tãm mẽmoj piitã ho amnhîptàr o pa hã amnhîjarê. No na pre kapêr o mẽ wrÿk xwÿnhjê mã ã mẽ kot amnhî nhîpêx anhÿr ã mẽ kãm karõ hkêt nê. Kojã jajaja mẽ pahto amnhîptàr o pa hkêt nê. ⁶ Tîrtûm kapêr ã kagà htûm kot ja jarênh kot:

Kwa Tîrtûm. Nã ãm hãmri na ka hte pika ja kamã ri mẽ ixpa xwÿnhjê jamãr mex rãhã ho apa.

Akĩnhã amarĩ ri mẽ ixpa xwÿnh tã amã mẽ ijapêê.

Nê mẽ ixkutã anojarêt rãhã ho apa.

⁷ Na ka hte tanhmã mẽ inhîpêx to pa mẽ te mẽ ixpê akapêr o mẽ wrÿk xwÿnhjê pyrãk.

Jao mẽ urãk nê akukwak ri mẽ inhmex nê ixpa ho ixpa.

Mẽ uràn mẽ ixàhpumunh nê ixihtÿx kêt tã mẽ inhmex nê ixpa.

⁸ Na ka pre ra ate mẽmoj to akator xwÿnh piitã mẽ inhîhkram haxà.

Nã ãm hãmri na ka pre ã mẽ inhîpêx anê Tîrtûm. Amex o amex. Anê.

Na pre ra mẽmoj piitã mẽ panhîhkram haxà. Pika nê kaxkwa nê kapêr o mẽ wrÿk xwÿnhjaja nê mẽkarõmnuti nê kot mẽmoj piitã hipêxja nhûm mẽ panhîhkram haxàr pa. Mẽ pahte ìhkô hã ho amnhîptàr o papa kaxyw. No na pu mẽ kormã piitã ho amnhîptàr kêt nê. ⁹ No kêt Jesusja na Tîrtûm mẽ pakurom ìhkram mẽmoj piitã haxàr par kumrêx. Kormã pika ja kamã ri pare ri na pre tanhmã amnhî nhîpêx to nê Tîrtûm kapêr o mẽ wrÿk xwÿnhjê hkĩnhã te amnhî to grire pyrã nê amnhî xà htÿx kamã hamak kãm ty. Tîrtûm kãm mẽ pahto mex prãm xàj ã mẽ pahpiitã mẽ panê

htyk anê. Tã nhũm Tĩrtũm akupỹm ho htĩr nê akupỹm amnhĩ wỳr ho api nê kêp Pahi Maati mex o mex ã harê. Na pre ã Jejusja mẽ panê amnhĩ nhĩpêx anê nhũm Tĩrtũm ja hã omu nê kukwak ri mẽ pahto mex nê.

¹⁰ Nê Tĩrtũm kot mẽmoj piitã ho kator jakamã mẽmoj piitã õ na. Na pre mẽ pakukamã hamaxpêr o:

—Inhmã ixkra xohtô hprãm. Kot paj nhỹrmã man amnhĩ wỳr mẽ ho api kê mẽ ixri mex rãhã nê pa ho pa. Nà kot paj ã mẽ hipêx anê. Nê Ixkra Jejus koja kêp mẽ õ Pahihti. Koja mẽ urak nê mẽmoj punuj pumunh o pa hãmri nê à htỳx kamã hamak o kêp mẽ õ Pahihti mã tãm. Anê.

¹¹ Na hte Jejus mẽ panê mẽ pahte amnhĩ tom-nuj rê nê hpãnhã mẽ pamã mẽ pahte amnhĩ nhĩpêx nyw jagjê nhũm Tĩrtũm ja hã mẽ pah-pumunh kôt mẽ pahto hkra. Kêp Jejus Nhĩpêêxà nê kêp Mẽpanhĩpêêxà maati jakamã nhũm Jejusja mẽ pahpê htõ nê mẽ pahpê htõx ã mẽ pajarê nê mẽ panhỹ hã hkĩnh nê.

¹² Tĩrtũm kapêr ã kagà htũm ã mẽ pajarênh kot anhỹr. Kamã Jejusja Mẽpanhĩpêêxà maati mã mẽ pajarênh kot:

Koja ixtõ nê ixtõxjaja akapêr mar kaxyw axpên wỳr akuprõ pa ma mẽ hkôt mra nê mẽ kãm akapêr jarê nê mẽ ãhkô hã amex ã gre. Anê.

¹³ Hãmri nê kãm:

Kot paj amnhĩ kaxyw akôt pix mã ijamaxpêr mex o ri ixpa. Anê.

Hãmri nê hpãnhã kãm:

Ot pa akrajê hkôt ri ixpa ho ixpa.

Ka na ka pre mẽ kêp ixtõ nê ixtõx kaxyw inhmã mẽ agõ.

Koja mẽ ixpyrà nê amnhĩ kaxyw amã hamaxpêr rãhã ho pa Tĩrtũm. Anê.

¹⁴ Nê mẽ pahpê pika nhõ xwỳnhjaja na pu htem ãm ri panhĩ pix ã papa. Nê panhĩ kamã pahkamrô hã ri papa. Jakamã na pre Jejus kot mẽ panê htyk kaxyw mẽ pahwỳr wrỳ nê mẽ pahpyrà nê ã ho mẽ pakamã kato. Tã mẽmo kaxyw na pre ã ho ã nê mẽ pahkõt pa? Nà ã ho htyk o Satanasti pê hihtỳx xà ho hapêx par kaxyw na pre ã amnhĩ nhĩpêx anê. Satanasti kêp mẽ kot amnhĩ tomnuj xwỳnhjê hpãm nê kêp mẽ htyk xwỳnhjê hpãm. ¹⁵ Jakamã na hte kot mẽ pahtã ãhkra pikamỳr pyràk o mẽ panhĩpêx pu mẽ ã hã pamã pahtyk pyma nê ri papa. Tã ra Jejus kot mẽ pahwỳr wrỳk nê te kêp mẽ papytãr pyràk o mẽ panhĩpêx jakamã pu mẽ tee ri pahtyk kukamã pajamaxpêr o ri pamã ma ho papa hkêt nê.

¹⁶ Nê Tĩrtũm kapêr o mẽ wrỳk xwỳnhjê ho mex kaxyw na pre Jejus pika hwỳr wrỳk kêt nê. Mẽ panhĩgêt finat Apraãw pyrà nê mẽ panhĩ ho panhĩ xwỳnhjê ho mex kaxyw na pre wrỳ. ¹⁷ Ijaew nhõ patrejaja na pre htem mẽ kot amnhĩ tomnuj mỳrapê mẽ hpãnhã Tĩrtũm mã mry hkwỳ pa nê hkamrô kapĩ nê mẽ ho Tĩrtũm wỳ. Kot hã mẽ omunh nê mẽ mex ã mẽ harênh kaxyw. Tã nhũm Jejus wrỳ nê mẽmo mryta pyrà nê ã mẽ panê hkamrô pikapĩr anê. Kaxyw na pre mẽ pahtõ maatija mẽ pahwỳr ã ho ã nê wrỳ nê mẽ pahpyrà nê ni nhõhy rũm kato. Jao kêp mẽ pahto Tĩrtũm wỳr xwỳnh maati. Na pre Tĩrtũm kãm hprãm xà hkõt mẽ panê mẽ pahte amnhĩ tomnuj pãnhã amnhĩrer

pa. Tã kot mẽ pahpyrà nẽ mẽmoj punuj pumunh nẽ amnhĩ xà htỳx kamã hamak o pa jakamã kệp mẽ pakamã ukaprĩ xwỳnh ã pixi mex na. ¹⁸ Kormã htyk kêt ri na pre mẽ pahpyrà nẽ omnuj nẽ ri pa. Nhũm mẽkarõmnuti nhõ pahi kot tanhmã amnhĩ tomnuj to hprãm xàj tee ri hkôt kãm ahkrox o pa hkapyrỳ nhũm hkôt amnhĩ nhĩpêx kêt nẽ amnhĩ nê ho axtem nẽ. Jakamã koja Satanastija uràk nẽ tanhmã mẽ panhĩpêx to nhũm Jejus mẽ pahtã omu nẽ amnhĩ pyrà nẽ tanhmã kệp mẽ panhĩpêx to pu mẽ ã hã kutã amnhĩ to htỳx nẽ papa.

3

Jejus kot amnhĩ to rax o Mojes jakrenh ã harẽnh Juãw 1.17-18

¹ E ixkrãmnhwỳjaja. Ra Tĩrtũm kot mẽ pahte kapêr mar nẽ tãm amnhĩ nhĩpêx o ri papa kaxyw mẽ pahto hkra jakamã kwa kêr ka mẽ Jejus kot tanhmã mẽ pamã amnhĩ nhĩpêx toja mã ajamaxpêr rãhã ho ri apa. Na pre Tĩrtũm mẽ pahwỳr kumẽ nhũm mẽ pahwỳr wrỳ nẽ Tĩrtũm kapêr o mẽ pajahkre ho ri mẽ pahkôt pa. Nẽ te kệp mẽ panhõ patre pyrà nẽ mẽ pahto Tĩrtũm wỳr o pa. ² Na pre Tĩrtũm finat Mojes kwỳ kaxyw Mojesja xãm nhũm kãm hprãm xà hkôt tanhmã mẽ hipêx to ho pa. Tã nhũm hpãnhã mẽ pakaxyw Kra Jejusja xãm nhũm Mojes pyrà nẽ Tĩrtũm kãm hprãm xà hkôt pix mã tanhmã mẽ panhĩpêx to ho pa. Hamẽ na pre wa Tĩrtũm jamaxpêr xà hkôt tanhmã kãm mẽ panhĩpêx to ho pa.

³ Koja mẽhõ amnhĩm ixkre mex nhĩpêx nẽ hipêx pa nhũm hkwỳjaja hwỳr mra nẽ omu nẽ mex

kumrêx ã harê. Nom kot hipêx xwÿnhnta àhpumunh xà hkôt hipêx jakamã tãm na mex o kot ixkreta jakrenh. Ja pyrà nê finat Mojes kot amnhĩ to rax tã nhũm Jejus kot amnhĩ to rax o kot hakrenh. Mojes te kêp ixkre nhĩpêxta pyràk no Jejus te kêp ixkre nhĩpêx xwÿnhnta pyràk jakamã kot amnhĩ to rax o kot Mojes jakrenh.

⁴ Nê mẽ kot ahpÿnhã amnhĩ krã hkôt tanhmã ixkre nhĩpêx to jakamã kot hipêx xwÿnhnta na mex o ixkreja jakrenh. Tã ja pyrà nê Tĩrtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwÿnh jakrenh par.

⁵ Nê finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nê ma kãm hkwÿjê piitã hkôt mẽ kãm kapêr jarênh o ri pa. Tĩrtũm tanhmã kot mẽ kãm kapêr tota kukamã nhũm mẽ kãm harênh o mẽ hkôt pa. No ãm Tĩrtũm mã tanhmã amnhĩ nhĩpêx to ho hpa xwÿnh pix na pre.

⁶ Nê Kris haxwÿja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tĩrtũm Kra kumrêx jakamã kurom kêp mẽ panhõ Pahihti kumrêx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mẽ kot hã tanhmã mẽ panhĩpêx to htã pu mẽ ÿ hã mẽ kutã amnhĩ to htÿx nê papa nê pajamexpêr o:

—Nà ixpunuj nê ixpa htã kot paj ixpunuj rãhã ixpa ho ixpa hkêt nê. Kojã nhÿrmã Tĩrtũm ixto mex kumrêx pa axte tanhmã ixpunuj to nê ixpa hkêt nê. Hêxta waa nê. Nã ja inhmã hprãm tÿx kumrêx.

Anhÿr o amnhĩ kukamã pajamexpêr o papa.

*Mê pahte Tirtûm kaga hkêt ã mê pamã karõ
Wam Korît 10.1-11; Jutre 5*

7-8 Annepê m na pre mêhõja tanhmã Tirtûm Karõ nhÿ hã kapêr to nê kapêr o:

E kêr ka mê Tirtûm kapêr mar tÿx o apa.

No ama nê ãm ama nê ri hã apa hkêt nê. Rÿ kapêr pê akrã hihtÿx o apa hkêt nê.

Mê akukamã mê anhÿgêjtjaja na prem ã amnhÿ nhÿpêx anê nê Tirtûm kapêr pê hkrã hihtÿx o pa. Kapôt ã Mojes kôt mê pata ã na prem kãm Tirtûm kapêr mar prãm kêt nê. Nê tee ri amnhÿ kukamã hamaxpêr nê akupÿm Ejit wÿr hkrã nê axpên mã: “Kwa na pu mê ra pahpunuj tÿx nê papa nhÿm Tirtûm ãm ja hã mê pahpumu nê tanhmã mê pahto mex to hkêt nê. Mãn ra mê pahkaga nà? E kwa pu mê awjanã nê ma akupÿm Ejit wÿr mãn papa.” Anê.

9-10 Na prem ã axpên mã kapêr anhÿr o ri pa hã amgrà pê 40.

Tirtûm xatã kot tanhmã mê ho mex to nhÿm mê kot amnhÿ tâ omunh tâ ãm omu nê htÿx ri amnhÿ hkrã hkôt pa.

Nhÿm tee ri amnhÿ tâ mê omu nê mê kamã gryk nê.

Hãmri nê hamaxpêr o: “Nà pêr mê hamaxpêr kot mê hã hkwÿ jêt kêt kumrêx. Te mê hamak kre hkêt pyrã nê ixkapêr mar kêt nê.” Anhÿr o hamaxpêr.

11 Hãmri nê mê kãm: “E mê inhma. Æ mê ate amnhÿ nhÿpêx anhÿrja mÿrapê kot kaj mê ma ixte mê amã pika mex nhõr mã xwÿnhta wÿr apa hkêt nê.” Anhÿr o mê kãm kapêr. Anê.

Ã mēhōja Tīrtūm Karō nhỹ hã te Tīrtūm tãm kot mē kãm kapēr pyrāk o mē harēnh anē. ¹² Jakamã kwa mē okora ixkràmnhwỳjaja. Kêr ka mē amnhĩ to mex o apa. Tīrtūm kêp Mēpahpãm ã pixi mex tã kot kaj mē tanhmã ajamaxpēr punuj to rỳ amnhĩ kaxyw hkôt ajamaxpēr kêt hãmri nē te ate amnhĩ katut kôt ãm pyrāk o hipêx nē hkaga. Kwa mē ã amnhĩ nhĩpêx anhỹr kêt nē. ¹³ Kêt mē Kris kôt axpên to axihtỳx o ri apa. Nē apkati mē ã axpên nhĩpêx anhỹr rãhã nē. Kot kaj mē anhỹr kêt hãmri nē mē amã Tīrtūm kapēr mar prãm kêt ã amnhĩ to amnhĩrĩt. Jao tanhmã amnhĩ tomnuj to ho ri apa nē atỳx ajamaxpēr o: —Nà ixte ã amnhĩ tomnuj anhỹr tã nhũm Tīrtūm ja hã ixpumu nē ãm hã ixpumu.

Anhỹr o ajamaxpēr japêr. Rỳ mē ajamaxpēr o:

—Nà na pa hte ã amnhĩ tomnuj anē nhũm Tīrtūm ja hã ixpumu nhũm ja kãm mex nē.

Anhỹr o ajamaxpēr japêr. ¹⁴ Kwa mē ri ã ajamaxpēr anhỹr kêt nē. Amnepê mã mē pahte Kris kôt amnhĩ xunhwỳr nhũm kot mē pahto hkrata ã na pu prem amnhĩ kaxyw hkôt pajamaxpēr o papa. Tã kêr pu mē arĩ ã amnhĩ nhĩpêx anhỹr tỳx o papa rãhã ty. ¹⁵ Tīrtūm kapēr ã kagà htũm kot ja jarēnh kot:

E kêr ka mē Tīrtūm kapēr ma nē mar tỳx nē.

No ama nē ãm mar nē ri hã apa hkêt nē.

Rỳ mē kot hkaga xwỳnhjê pyrã nē kêp akrã hihtỳx kêt nē. Anē.

¹⁶ Mē panhĩgêtjaja na prem Mojes kôt pika pê Ejit rũm kato nē hkĩnh nē ma kapôt ã kormã pika mex wỳr pa. Nom Tīrtūm kapēr mar nē hkôt amnhĩ nhĩpêx rãhã hkêt nē. Na prem kuma nē hkôt

amnhĩ nhĩpêx o hã apkati grêre htã ra mẽmoj nhỹ hã omnuj nẽ pa hã amnhĩ pumu nẽ tee ri amnhĩ kukamã hamaxpêr. ¹⁷ Jao xatã kapêr nhĩrôp kuhê nẽ amnhĩ hkrã hkôt pix mã amnhĩ nhĩpêx o pa ho ra hã amgrà pê 40. Hãmri nhũm tee ri amnhĩ tã mẽ omu nhũm ja kêp omnuj nẽ. Jakamã nhũm mẽ piitã kapôt ã ri pa nẽ gaa nẽ pikaprãr pa. ¹⁸ Mẽ kot kapêr mar kêt jakamã nhũm mẽ kãm:

—Nà ã mẽ ate amnhĩ nhĩpêx anhỹr o ri apaja mỳrapê kot kaj mẽ ixte mẽ amã mẽ amex nhõr mã xwỳnhhta wỳr apa hkêt nẽ. Anẽ.

¹⁹ Tã mẽ kot amnhĩ kaxyw Tĩrtũm kôt hamaxpêr o pa hkêt jakamã na prem pika mexta wỳr hpôx kêt rãhã pikaprãr pa. Nhũm mẽ hkra nẽ mẽ htãmnhwỳjê pixjaja na prem mẽ mỳr pê hwỳr pøj nẽ kamã pa.

4

Mẽ pahte Tĩrtũm kukwak ri pajamakêtkati nẽ ri papa hã mẽ pajarênh

¹ Mẽ pahte Tĩrtũm kukwak ri pajamakêtkati nẽ ri papa ho papaja Tĩrtũm kãm hprãm jakamã kwa kêr pu mẽ amnhĩ pumunh mex o papa. Nẽ wam mẽ panhĩgêt rom Tĩrtũm kapêr mar tỳx nẽ hkôt mãn kêt ri amnhĩ nhĩpêx mex rãhã nẽ. Kêr pu mẽ kurom mẽ pajamak kãm amnhĩ krit xà hã pika mexta wỳr pøj. ² Mẽ kot mẽ pahpyrà nẽ Tĩrtũm kapêr mar mex tã na htem amnhĩ kaxyw hkôt hamaxpêr kêt nẽ. Te mẽ kot mar kêt pyrãk. ³ ãm mẽ kot amnhĩ kaxyw Kris mã hamaxpêr xwỳnh pixjaja na htem kukwak ri hamakêtkati nẽ ri pa ho pa. Amnepê mã mẽmoj piitã hkêt ri na pre Tĩrtũm

mëmoj piitã ho kator pa hãmri nhũm apkati nhũm axte mëmoj tã àpênh kêt nê. ãm õ krĩ kamã arĩ hamakêtkati nê hkôkôt o hkrĩ. Tã më pahte uràk nê pajamakêtkati nê papa ho papaja na kãm hprãm. No wam ri më pa xwÿnhjaja më kot amnhĩ tomnuj mÿrapê na pre Tĩrtũm më kot urà nê hamakêtkati nê paja nê më hkurê. Kapêr ã kagà htũm kot harênh kot:

Na pre Tĩrtũm tee ri amnhĩ tã më kot hipêx ã më omu nhũm ja kêp omnuj nê. Hãmri nhũm më kãm: “Nà kot kaj më ixkukwak ri axàmnhĩx ajamakêtkati nê apa hkêt nê.” Anê.

⁴ Nê kot harênh kot:

Na pre Tĩrtũm àpênh ã arĩgro kêp 6 hãmri nhũm arĩgro pê 7ta ã nhũm axte mëmoj tã àpênh kêt nê. Na pre arĩ hkôkôt o nhÿ.

Arĩgro pê 7 ã arĩ hamakêtkati nê hkôkôt o nhÿ. Anê.

⁵ Nê më kot kapêr mar nê ãm mar xwÿnhjê jarênh kot:

Kot kaj më aa ixkukwak ri axàmnhĩx nê ajamakêtkati nê apa hkêt nê. Anê.

⁶ Më panhĩgêjtjaja kot amnhĩ kaxyw Tĩrtũm kôt hamaxpêr kêt jakamã na prem hamakêtkati nê ri pa hkêt nê. Tã më papajaja na Tĩrtũm arĩ kãm më paxàmnhĩx nê pajamakêtkati nê papa hprãm.

⁷ Amnepêm Ijaew Tĩrtũm kôt hamaxpêr kêt jakamã na prem kapôt ã pikaprâr pa. Hãmri nhũm amgrà xohtô nê hapêx nhũm Tĩrtũm më hkanrêhã më htàmnhwÿjê hõ pê finat Tawija mã kapêr nhũm kuma nê më pamã tanhmã kapêr tota ã kagà nê hã kagà kot:

Kwa kêr ka ixkapêr ma nê mar tÿx nê.

No mẽ anhiġetjê pyrà nê akrã hihtỳx ho inhma nê
ãm inhmar kêt nê. Anê.

Na pa pre ra mẽ amã ã ja jarênh anê. ⁸ Na pre
finat Jojueja finat Mojes mỳr pê ma pika pê Kanaã
hwỳr mẽ hkanrêhã mẽ hkrajê o pa nê hwỳr mẽ o
pôj. Tã nhũm prem Jojue kukwak ri hamakêtkati
nê pa ho pa hkêt nê. Kêp ãm kukwak ri ã amnhĩ
nhĩpêx anhỳr ronhỳx Tĩrtũm axte mẽ kãm mẽ
hamakêtkati nê mẽ hamak kãm amnhĩ krit nê mẽ
pata hkukamã harênh kêt nê. ⁹ Nom mẽ pahte
kukwak ri pajamakêtkati nê pajamak kãm amnhĩ
krit nê ri papa ho papaja na Tĩrtũm arĩ kãm hprãm.
¹⁰ Na pre arĩgro pê 6ja ã mẽmoj piitã ho kator
pa nhũm apkati nhũm hamakêtkati nê hkôkôt o
nhỹ. Tã kot puj mẽ pahpê hkrajaja amnhĩ to kuwỳ
nhũm tanhmã mẽ pahkrã hto pu mẽ kukwak ri
uràk nê paxàmnhĩx nê pajamakêtkati nê papa ho
papa. Te Tĩrtũm ãpênh pa nhũm apkati nhũm
hamakêtkati nê hkôkôt o ỳrta pyràk. ¹¹ Jakamã kwa
kêr pu mẽ amnhĩ to kuwỳ kê ã mẽ panhĩpêx anê pu
mẽ uràk nê ã amnhĩ nhĩpêx anhỳr rãhã ho papa.
Nom kot pu mẽ pahkwỳ Ijaewjê pyrà nê kapêr
kwỳm amnhĩ nhĩpêx o papa hãmri nê mẽ urà nê
paxàmnhĩx pajamakêtkati nê papa hkêt nê.

Tĩrtũm kapêr te kot wapo xwa gix pyràk ã harênh

¹² Nê Tĩrtũm kapêrja te ã ho tanhmã kot mẽmoj to
kaxyw hihtỳx pyràk. Nê te wapo xwa gix pyràk.
Koja mẽhõ ô wapo xwa mex nê ho mẽmoj jakàr
mex nê. Ho mry hi jakàr mex pê kaxwỳnh kãm
hi kanhĩn o amnhĩrĩt. Ja pyrà nê na hte Tĩrtũm
kapêr mẽ pajamaxpêr o amnhĩrĩt nê mex ã harê rỳ
omnuj ã harê.

¹³ Nê na htem Tĩrtũm pê mẽmoj to pimxur kêt nê. Na hte hprĩ hã mẽmoj piitã omunh pa. Nê mẽ pajamaxpêr kôt mẽ pahpumunh pa. Na pu htem ã kot mẽmoj piitã omunh par anhÿr xwÿnhja noo mã tanhmã amnhĩ nhĩpêx to rãhã ho papa.

*Jejus kêp mẽ panhõ patre maati hã harênh
Eprêw 10.19-25; Wam Juãw 2.1-2*

¹⁴ Nê Ijaew nhõ patrejaja na pre htem Tĩrtũm mã amnhĩ jarênh xà hã ixkre hwÿr agjê nê kamã mẽ ho Tĩrtũm wÿr o pa. Ja pyrã nê na pre ra Jejus Tĩrtũm nhõ krĩ hwÿr api nê kamã mẽ pahto hwÿr o hkrĩ. Kêp Kra kumrêx jakamã kêp mẽ pahto Tĩrtũm wÿr xwÿnh maati. Jakamã kwa kêr pu mẽ amnhĩ kaxyw hkôt pajamaxpêr tÿx rãhã ho papa.

¹⁵ Satanasti na pre te kot mẽ panhĩpêx pyrãk o Jejus nhĩpêx. Nê tee ri kot tanhmã kãm kapêr to nhũm kot mar nê tanhmã amnhĩ tomnuj to hprãm xaj ãm ri kãm ahkrox kaprÿ nhũm kutã amnhĩ to htÿx nê hkôt amnhĩ nhĩpêx kêt nê. Tã kot Satanasti kot amnhĩ nhĩpêx ã omunh mex jakamã na hte kêp mẽ pahpumpaxar mex o pa. Kot mẽ paxirerek kôt mẽ pahpumunh mex. ¹⁶ Jakamã kwa kêr pu mẽ amnhĩ tã kamã pahpijaàm kêt kãm paxãmnhĩx ri amnhĩ to hwÿr o papa. Kêp mẽ pakutã nojarêt xwÿnh nê kêp mẽ pakamã ukaprĩ xwÿnh jakamã kêr pu mẽ tee ri mẽmoj tã amnhĩ pumu nê amnhĩ to hwÿr kurê kumrêx. Hãmri nê ÿ hã paxãmnhĩx nê pajamakêtkati nê ri papa.

5

¹ Nê mẽ panhõ patre maati Jejusja Tĩrtũm na pre mẽ pakaxyw ãm. Kêp mẽ pahkwÿ hã mẽ pakaxyw

ãm nhũm hte mẽ pahto Tĩrtũm wỳr o pa. Nẽ kãm mẽ pahkĩnh xà nhõr o pa. Kot ja hã mẽ pahpumunh nẽ mẽ pahte kapêr kwỳm tanhmã amnhĩ nhĩpêx to ho papa hã mẽ pakamã gryk o hapêx tokyx anhỹr kaxyw.

² Mẽ panhĩgêjtjaja na pre htem mẽ õ patre maati hwỳr mra nẽ kãm tanhmã amnhĩ tomnuj to hã amnhĩ jarẽ nhũm mẽ kuma nẽ mẽ kamã ukapĩrĩ nẽ. Mẽ urà nẽ kormã kot Tĩrtũm kôt amnhĩ nhĩpêx totuj anhỹr jakamã na pre mẽ kot tanhmã amnhĩ jarẽnh toja ma nẽ mẽ kamã ukapĩrĩ nẽ. ³ Hãmri nẽ mẽ hpãnhã Tĩrtũm mã mẽmoj gõ nẽ mãânẽn amnhĩ pãnhã kãm mẽmoj gõ. Mẽ urak nẽ kot amnhĩ tomnuj o paja mỳrapê amnhĩ pãnhã kãm mẽmoj gõ. ⁴ No na pre hte patrejaja amnhĩ krã hkôt kêp patre maati kaxyw amnhĩ xunhwỳr kêt nẽ. Tĩrtũm kot mẽ kaxyw mẽ unhwỳr jakamã na pre mẽ kaxyw finat Arãwja xãm nhũm kêp mẽ õ patre maati hã mẽ ho Tĩrtũm wỳr o pa.

⁵ Nẽ Kris haxwỳja kêp mẽ panhõ pahi maati hã tãm kot amnhĩ xãm kêt. Tĩrtũm na pre mẽ pakaxyw ãm nẽ tanhmã kãm kapêr to nẽ kãm:

Nà apê Ixkra na ka.

Kot paj jarãhã ixpê Anhĩpêêxà hã mẽ kãm amnhĩ jarẽ. Anẽ.

⁶ Nẽ hpãnhã kãm:

Kot kaj Mekijetek pyrà nẽ apê patre maati hã mẽ ho ixwỳr rãhã ho ri apa. Anẽ.

⁷ Jesus kormã pika ja kamã pa ri na pre amnhĩ to Tĩrtũm wỳr rãhã ho pa. Tõhã hkapĩrĩ nẽ tee ri mẽmoj tã amnhĩ pumu nẽ amnhĩ to kuwỳ. Nẽ tee ri mẽ kot hpĩrta kukamã hamaxpêr nẽ mỳr

kãm amnhĩ to kuwỳ. Kop apu Tĩrtũm kãm mẽ kot kęp hpĩr prãm kêt ronhỹx pre tanhmã nê mẽ kãm hkurê xwỳnhjê ho nhũm mẽ hpĩr kêt nê. Jakamã nhũm pre ã amnhĩ to hwỳr anê. No ãm Tĩrtũm kãm prãm xà hkôt kãm amnhĩ nhĩpêx prãm jakamã nhũm kuma no ãm tanhmã nê mẽ ho hkêt nhũm prem kupĩ. ⁸ Kęp Tĩrtũm Kra kumrêx tã amnhĩ xà htỳx kãm hamak kãm ty. Jao Tĩrtũm kãm hprãm xà hkôt amnhĩ nhĩpêx ã amnhĩ pumunh mex nê. ⁹ Na pre amnhĩ xà htỳx kãm hamak o amnhĩ mex o amnhĩ mex ã mẽ kãm amnhĩ to amnhĩrĩt. Jakamã na hte mẽ kot kapêr kôt ri amnhĩ nhĩpêx o mẽ pa xwỳnhjê mã mẽ kot amnhĩ nhĩpêx nyw jagjê nê nhỹrmã Tĩrtũm mẽ wa kuri mẽ htĩr tũm nê mẽ pa mã xwỳnhjê hã mẽ harê. ¹⁰ Jakamã na pre Tĩrtũm Mekijetek pyrã nê kęp patre maati kaxyw ãm.

Mẽ pahte Kris kaga nê mẽ pahkurê

Wam Korĩt 3.1-2, 13.11, 14.20; Epes 4.11-16

¹¹ Nê Jejus kęp mẽ pahto Tĩrtũm wỳr xwỳnh maati hã harênhja inhmã ixprĩ hã mẽ amã harênh par prãm tã ka mẽ kormã inhmar tỳx kêt nê. Pa tee ri ixprĩ hã mẽ amã harênh kaprỳ. Te mẽ amã mar prãm kêt o amõr pyræk. ¹² Amnepê mã mẽ ate Kris kôt amnhĩ xunhwỳr nê kapêr mar tỳx tã kormã nhãm amnhĩ xô ri ho amnhĩ kwỳjê jahkre ho ri apa hkêt nê. Te mẽ ate hã ano hkêt pyræk jakamã na pa hte arĩ mẽ amã kapêr kot amnhĩrĩt mex xwỳnh kwỳ ho mẽ ajahkre ho pa. No kot amnhĩrĩt mex kêt xwỳnh o mẽ ajahkre hkêt nê. Te mẽ hkaràre kot amnhĩ nhĩpêx pyræk o na ka htem amnhĩ nhĩpêx o apa. Na hte mẽ hkaràre mẽõ mex kur kêt nê. ãm kormã katorxà hkà pix kaô. Ja pyrã nê ãm Tĩrtũm

kapêr kot amnhîrît mex xwÿnhhta pix na ka mẽ mar tÿx o apa nom kapêr kot amnhîrît mex kêt xwÿnhja ka mẽ mar mex kêt nê.

13 Nê mẽ hkaràre kormã Tĩrtũm kapêr mar kêt jakamã na htem kormã mẽmoj mex nê mẽmoj punuj pumunh kêt nê. Tã te mẽ ate mẽ kot amnhĩ nhĩpêx pyràk.

14 Mẽ kot Tĩrtũm kapêr mar mex xwÿnhjaja na htem hprĩ hã kapêr piitã mar tÿx nê. Kot amnhîrît mex xwÿnhhta mar tÿx nê mãänên kot amnhîrît mex kêt xwÿnhja nhũm mēhprĩ hã piitã mar tÿx nê. Te ho mẽ àptàr kot mẽõ mex kur o pata pyràk. Jao ra mẽ àptàr jamaxpêr o hamaxpêr o ri pa nê hamaxpêr o:

—Kot paj tãm amnhĩ nhĩpêx o ri ixpa nhũm ja inhmã mex nê. Nom kot paj axtem tanhmã amnhĩ tomnuj to nhũm ja ixpê omnuj nê. Jakamã kot paj tãm amnhĩ nhĩpêx pix o ri ixpa nhũm Tĩrtũm mã ja mex nê. Anê.

6

1-2 Na pu prem ra Tĩrtũm kapêr kot amnhîrît mex xwÿnhhta kwÿ ma. Tãm na ja:

Kris kot mẽ panê tanhmã amnhĩ nhĩpêx to hã harēnhja.

Nê mẽ pahte amnhĩ tomnuj kaga hã kot mẽ pamã karõja.

Nê amnhĩ kaxyw Tĩrtũm kôt mẽ pajamaxpêr ã mẽ pamã karõja.

Nê mẽ pahpê Tĩrtũm kra hã amnhĩ to amnhîrît kaxyw mẽ kot mẽ pahkrã kumrãr ã pamã karõja.

Ně mẽ pahte Tĩrtũm mã tanhmã amnhĩ nhĩpêx to ho papa hkukamã mẽ kot mẽ pahkrã hã ĩhkra jaxwỳr nẽ mẽ pahto Tĩrtũm wỳr ã mẽ pamã karõja.

Ně mẽ pahtyk nẽ akupỹm mẽ pahtĩr ã mẽ pajarẽnhja.

Ně Tĩrtũm kot nhỹrmã mẽ kot amnhĩ xà htỳx kãm hamak tũm xà hwỳr mẽ kêp hkra hkêt xwỳnhjê janorja.

Mẽmojja piitã pu mẽ ra harẽnh mar tỳx nẽ. Prĩ hã kot amnhĩrĩt mex. Tã kwa kêr pu mẽ hpãnhã hijuk ri kot amnhĩrĩt mex kêt xwỳnh kwỳ ma. Jao mẽ pahpê Tĩrtũm kra xàptàr mex nẽ ri papa. ³ Jakamã kwa kêr pu mẽ kot amnhĩrĩt mex xwỳnh kumrêx kwỳ ma nẽ hpãnhã hijuk ri kot amnhĩrĩt mex kêt xwỳnh kwỳ ma. Nẽ axpẽn mã harẽnh rãhã ho ri papa. Nà koja Tĩrtũm kãm ja prãm pu mẽ ã amnhĩ nhĩpêx anhyr rãhã o ri papa.

⁴⁻⁶ Na pre ra mẽ pahkwỳjaja Kris kaga nẽ htỳx ri amnhĩ nhĩpêx o pa. Mẽ kot kapêr mar tỳx tã axtem nẽ hkaga jakamã koja mẽ axte kapêr mar kêt nẽ. Ra mẽ kãm mar prãm kêt. Kot puj mẽ tee ri axte mẽ kãm harẽnh o papa kaprỳ. Na prem hprĩ hã kuma. Tĩrtũm kãm mẽ ho hkra hprãm ã harẽnhja nhũm prem hprĩ hã kuma nẽ kãm mar prãm nẽ hkôt amnhĩ xunhwỳ. Hãmri nhũm Tĩrtũm Karõ te mẽ panhĩpêx pyrã nẽ mẽ hkarõ mã agjê nẽ mẽ kot amnhĩ to mex o pa kaxyw tanhmã mẽ hkrã hto nhũm prem ý hã tanhmã kãm amnhĩ nhĩpêx to ho pa. Nẽ kãm Tĩrtũm kapêr mar prãm nẽ. Nẽ axpẽn mã mex o mex ã harẽnh o pa. Nẽ aa mẽ kot mẽmoj pumunh kêt kwỳ pumu nẽ axpẽn mã harẽnh o:

—Nà Krisja ãm hãmri àhpumunh tỳx o àhpumunh

tỳx. Koja nhỹrmã akupỹn mẽ pahwỳr wrỳ nẽ axte mẽ pamã àhpumunh tỳx o amnhĩrít pu mẽ omu.

Anhỹr o kapěr tã tanhmã hamaxpěr to nẽ hkaga. Jakamã te mẽ kot axte Tĩrtũm pẽ Krata pĩ hã nhôr nẽ hpĩr pyràk. Nẽ te mẽ piitã mẽ noo mã tanhmã haprỳ hto nẽ tanhmã kãm kapěr punuj to pyràk. Jakamã kot pu mẽ tee ri akupỹm tãm mẽ unhwỳr prãm kaprỳ.

⁷ Na hte Tĩrtũm mẽ pahto mex rãhã ho pa. Jao mẽ pamã mẽ pahpur ã na rẽ pu mẽ kamã panhõ rũnh nẽ. Jakamã mẽ kot amnhĩ kaxyw Kris kôt hamaxpěr nẽ hkôt amnhĩ xunhwỳr prãm xwỳnhjaja te mẽ hpur mex nẽ kamã mẽmoj ô rũnh pyràk. Nẽ uràk nẽ amnhĩ to mex o pa. ⁸ Nom koja mẽ hpur kãm mẽmoj nhĩgrôt mex kêt japêr. Kamã mrônhi nẽ kahpare nẽ mẽmoj punuj pix hapôj nhũm mẽ tee ri omu nẽ hkaga kurê kumrêx. Tã mẽ kot Kris kaga xwỳnhjaja te pur punuj kot amnhĩ nhĩpêxta pyràk nhũm Tĩrtũm te kêp pur nhõ dõn pyràk. Jao tee ri amnhĩ tã mẽ kot amnhĩ nhĩpêx ã mẽ omu nẽ mẽ hkaga kurê kumrêx nẽ ma mẽ kot amnhĩ xà htỳx kãm hamak tũm xà pẽ kuwyta wỳr mẽ rẽnh pa.

⁹ E ixkràmnhwỳjaja. Inhmã mẽ akĩnh jakamã na pa ã mẽ amã mẽ kot Kris kaga xwỳnhjê jarẽnh anẽ. Nom te mẽ ate mẽ uràk kêt. Kris kôt mẽ ate amnhĩ xunhwỳr xwỳnh mex na ka mẽ. Ra mẽ ate hkôt amnhĩ xunhwỳr tỳx jakamã te mẽ apê pur mexta pyràk. ¹⁰ Na ka htem Kris kôt mẽ akwỳjê ho mex o ri apa. Te mẽ amã amnhĩ tã ma pyràk o axpẽn nhĩpêx o ri apa nhũm Tĩrtũm ja hã mẽ apumu. Tã koja tanhmã ja hã mẽ ato mex to. Kot tãm mẽ

panhîpêx o pa jakamã koja tanhmã mẽ ate axpên nhîpêx mex tota ã tanhmã mẽ ato mex to.

¹¹ Tã kêr ka mẽ arĩ ã axpên nhîpêx anhÿr o ri apa rãhã ty kê nhÿrmã ja hã mẽ ato mex nê. ã mẽ ate amnhĩ nhîpêx anhÿr o apaja na inhmã hprãm tÿx kumrêx. ¹² Kot kaj mẽ ã amnhĩ nhîpêx anê hãmri nê amã kaga nê apa hkêt nê. Nê amnhĩ nhîpêx o te Tirtûm kra hkwy htyk xwÿnhjaja kormã htir ri kot amnhĩ nhîpêxta pyrãk. Na prem amnhĩ kaxyw Tirtûm mã hamaxpêr tÿx rãhã ho pa. Kot mẽ ho mex ã mẽ hã amnhĩ jarênhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tirtûm ra kot mẽ hã amnhĩ jarênh xà hkôt mẽ ho mex nê. Tã kêr ka mẽ urak nê ã amnhĩ nhîpêx anhÿr o ri apa rãhã ty. ¹³⁻¹⁵ ã na pre finat Apraãwja amnhĩ nhîpêx anê. Kormã hkra hkêt tã nhũm Tirtûm kãm hkra nê kanrêhã htãmnhwÿjê hkukamã tanhmã mẽ harênh to nê kãm:

—Pa Apraãw. E inhma. Kot paj aprõ mẽ war ato mex nê. Kot kaj war akra hãmri nê gaa nhũm akanrêhã war atãmnhwÿjaja ohtô rax kumrêx. ãm hãmri na pa ã mẽ hkukamã amã mẽ harênh anê. Kot paj amã amnhĩ jarênh xà hkôt ã anhîpêx anê. Ixpê mẽ anhîpêx xwÿnh na pa ã amã amnhĩ jarênh anê. Anê.

Tã ã kãm wa hkra jarênh anhÿr tã nhũm wa tokyx hkra hkêt nê. Nom tee ri ja hã amnhĩ pumu nê Tirtûm kot wa kãm hêx ã hkamnhix kêt nê. ãm hkamnàr rom ã hamaxpêr anê nê hamaxpêr o:

—Nà kot paj wa nhÿrmã ixkra. Tirtûm tãm kot wa inhmã wa ixkra jarênh kênã. Anê.

Tã nhũm amgrà xohtô rax kumrêx nê hapêx nhũm wa hkra. Nhũm axte amgrà hkwy hapêx nhũm wa hkanrêhã htàmnhwý hkwy. Ra Tĩrtũm kot mē hkukamã Apraãw mã mē harênh xà hkôt. Tĩrtũmja hihtýx o hihtýx nê àhpumunh o àhpumunh jakamã na pre amnhĩ jarênh xà hkôt ã wa kãm wa hkra nê wa htàmnhwýjê nhõr anê. Kot ra wa kãm hã amnhĩ jarênh xà hkôt. No ri nhãm mēhõ nhĩxi jarênh kôt wa kãm wa hkra jarênh kêt nê. Mēhõ kot we hihtýx o hihtýx o Tĩrtũm jakre nhũm we ri hixi jarênh kôt ã wa kãm mē harênh anê? Amrakati kumrêx. Jakamã na pre wa kãm amnhĩ jarênh o:

—Nà ixàhpumunh xà hkôt na pa ã war amã war akra jarênh anê. Anê.

¹⁶ No pika ja kamã na htem ã amnhĩ jarênh anhýr kêt nê. Na htem mēhõ mã tanhmã mēmoj tã amnhĩ jarênh to kaxyw nê mēhõ hihtýx o kot hakrenh xwýnh nhĩxi jarênh kôt amnhĩ jarê. Nê amnhĩ jarênh o:

—Nà ixte jahti noo mã ã amã amnhĩ jarênh anhýr jakamã ãm hãmri na pa ã amnhĩ jarênh anê. Anê.

Kot hã amnhĩ to hêx nhũm hihtýx o kot hakrenh xwýnhhta kot hã harênh mar nê hã tanhmã homnuj to pymaj na htem ã mē hixi jarênh kôt mēmoj tã amnhĩ jarênh anê. Hãmri nê kot tanhmã hã ho pymaj ra kot amnhĩ jarênh xà hkôt tanhmã mēmoj nhĩpêx to. ¹⁷ Nom Tĩrtũm na hte uràk nê nhãm mēhõ nhĩxi jarênh kôt ri mēmoj tã amnhĩ jarênh kêt nê. Na hte tãm amnhĩ jarênh xà hkôt mēmoj to anê nê aa hã amnhĩ to hêx kêt nê. Na pre mē pahpê hkrajê mã kãm:

—Kot paj nhÿrmã mẽ ato mex rax nê. ãm hãmri na pa mẽ amã amnhĩ jarê. Ixte amnhĩ pumunh xà hkôt na pa ã mẽ amã amnhĩ jarênh anê. Anê.

Mẽ pahte ãm hãmri kot amnhĩ jarênhja mar nê amnhĩ to hêx kêt ã omunh kurê kumrêx kaxyw. Koja Tĩrtũm mẽmoj tã ã amnhĩ jarênh anê hãmri nê hijuk ri axtem hpãnhã tanhmã amnhĩ jarênh to hkêt nê. ¹⁸ Jakamã koja nhÿrmã ma amnhĩ wÿr mẽ pahto àpir ã amnhĩ jarê hãmri nê ãm hãmri amnhĩ jarê nê amnhĩ jarênh o:

—Nà ãm hãmri ixte amnhĩ pumunh xà hkôt na pa mẽ amã ja hã amnhĩ jarê. Anê.

Koja ã amnhĩ jarênh anê hãmri nê hijuk ri axte hpãnhã tanhmã mẽmoj jarênh to hkêt nê. Ra kot ã amnhĩ jarênh anhÿrja koja arĩ rãhã nê. Jakamã e kwa kêr ka mẽ tee ri amnhĩ kukamã ajamaxpêr o ri apa hkêt nê. Ra mẽ pamex nê ri papa kaxyw Tĩrtũm kôt amnhĩ xunhwÿr jakamã kêr pu mẽ arĩ kot mẽ pahto mex rax xà hã arĩgrota jamãr rãhã ho ri papa.

¹⁹ Na hte kanôre ho htÿx xàja kanôre ho htÿx nhũm ma gô hkôt pa hkêt nê. Ja pyrã nê kot puj mẽ Tĩrtũm kot mẽ pahto mex xà kamã pajamak o papa hãmri nê hkaga hkêt nê.

Amnepê mã na pre hte mẽ panhõ patre maatija Tĩrtũm mã amnhĩ jarênh xà hã ixkre hwÿr agjê nê hkôt ã kupêxê ho hitom maati hwÿr agjê nê kamã mẽ ho Tĩrtũm wÿr o kuhê. Tã nhũm Jejus akupÿm kaxkwa hwÿr api nê Tĩrtũm ri hkrĩ hãmri nê patre maatita pãnhã tãm mẽ pahto hwÿr o hkrĩ. ²⁰ Na pre ra mẽ pakukamã kaxkwa hwÿr api nê kamã pa ho pa nê finat Mekijetekja pyrã nê kêp mẽ panhõ

patre maati. Tã koja mẽ pahto Tĩrtũm wỳr rãhã nẽ pa ho pa.

7

Patre Mekijetek jarẽnh

¹⁻³ E kot paj ixprĩ hã mẽ amã tanhmã finat Mekijetekja jarẽnh to ka mẽ inhma. Krĩ pẽ Sarẽ kamã na pre kẽp mẽ õ pahi nẽ mããnẽn kẽp mẽõ patre. Sarẽja mẽ pakapẽr kãm kẽp: “Mẽ hamakêtkati nẽ ri mẽ pa xwỳnhjẽ nhõ krĩ.” Jakamã Mekijetekja mẽ pakapẽr kãm kẽp: “Mẽ hamakêtkati nẽ ri mẽ pa xwỳnhjẽ nhõ pahi.” Nẽ mããnẽn kẽp: “Pahi kot tãm amnhĩ nhĩpêx o pa xwỳnh.” Nẽ Mekijetek nhĩpêxà nẽ katorxà nẽ higêt nhĩxija mẽ pahte harẽnh mar kêt. Nẽ kator ã arĩgro nẽ htyk ã arĩgroja mããnẽn mẽ pahte harẽnh mar kêt. Tĩrtũm kapẽr ã kagà htũm kot tanhmã ja jarẽnh to hkêt. ãm Jejus pyrà nẽ kẽp patre hã mẽ ho Tĩrtũm wỳr rãhã ho pa xwỳnh pix ã kot harẽnh. ãm ja pix na mẽ pahte harẽnh mar. Nẽ kot amnhĩ to rax xwỳnh jakamã na pre Apraãw nhỹri omu nẽ hã hpijaàm kaxyw kãm hikukrêx kwỳgõ. Na pre hkwỳjẽ mẽ ra mẽ urojẽ kutã amnhĩ xunhwỳ nẽ pijapu nẽ mẽ kẽp mẽ õ pahi ho 4 nẽ mẽ himex. Nẽ mẽ kẽp mẽ hikukrêx kwỳptà nẽ hamỳ nẽ ma õ krĩ hwỳr o mõ. Nẽ kormã pry hã mõi ri Mekijetek kaxpa nhũm amnhĩ wỳr omu nẽ kãm:

—Pa Apraãw? E kẽ Tĩrtũm ato mex nẽ ka amex nẽ apa. ãnẽ.

Nhũm amnhĩ tã kuma nẽ hkĩnh nẽ. Hãmri nẽ kãm mẽ hikukrêx kwỳptàr xwỳnhhta hkwỳgõ nhũm hamỳ nẽ ma amnhĩm o mõ. ⁴ Na pre Apraãw kot amnhĩ to rax ã omu nẽ kãm mẽmojta kwỳgõ.

Kêp mē pahpê Ijaew pàr krax jakamã mãânên kot amnhĩ to rax tã Mekijetekja uràk nē kot amnhĩ to rax ã omu nē kãm mēmota kwỳ gō. ⁵ Finat Mojes kot Ijaew mã Tĩrtũm kapêr jarênh xà hkôt kãm kugō. Na pre mē kãm:

—Mē akwỳ pē finat Rewi hkanrêhã htàmnhwỳjaja kêp mē anhõ patre jakamã kêr ka mē kãm mē akukrêx kwỳ nhõr o ri apa. Kot kaj mē akrit kêp 10 nē kãm ho pixi nē agō. Nē mē akãxpore kêp 10 nē kãm hõ gō. Kêr ka mē ã mē kãm mē akukrêx nē mē akrit kwỳ nhõr o apa anê. Nē kêr ka mē kãm mēmoj mex pix gō. Mē kêp mē akwỳ na mē. Mē apiitã mē apê Apraãw kanrêhã htàmnhwỳ jakamã kêr ka mē ã mē hipêx anhỹr o apa. Anê.

⁶ Tã Mekijetekja kêp Rewi hkwỳ hkêt tã nhũm Apraãw amarĩ ã hipêx anê nē kãm pahi htyk xwỳnhjê kukrêxta kwỳ gō. Jao hikukrêxta kamã mēmoj kêp 10 nhũm omu nē kamã kãm ho hpỹnh nē kugō. Na pre ã kãm mēmoj nhõr anê. Hãmri nhũm amnhĩm hamỳ nē kãm:

—Nà ãm hãmri koja Tĩrtũm ato mex rax nē. Anê.

Ra Tĩrtũm kot Apraãw kanrêhã kãm htàmnhwỳ ho ohtô nē mē hkukamã mē harênh jakamã nhũm Mekijetekja ã kãm Tĩrtũm kot ho mex ã harênh anê. ⁷ Mē kot amnhĩ to rũnh o mē hakrenh xwỳnh pixjaja Tĩrtũm kot mē ho mex kaxyw mē ho àhwỳr o pa jakamã na pre Apraãw o Tĩrtũm wỳ. Jao kot amnhĩ to rax o kot hakrenh ã amnhĩ to amnhĩrit. ⁸ Hãmri nē Rewi hkanrêhã htàmnhwỳ kot amnhĩ nhĩpêx pyrã nē Apraãw o Tĩrtũm wỳ nē kêp mēmojta jamỳ. Mē uràk nē mēmoj kamã kêp 10ja rũm ho hpỹnh nē amnhĩm hamỳ. Nom kot amnhĩ to rax o Rewi hkanrêhã htàmnhwỳjê jakrenh. Tĩrtũm

kapêr ã kagà htũm kot Rewi hkanrêhã htàmnhwÿjê htyk par ã mẽ harênh tã tanhmã Mekijetek htyk ã harênh to hkêt jakamã kot amnhĩ to rax o kot Rewi hkwÿjê jakrenh.

9-10 Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htàmnhwÿ mã xwÿnh. Jakamã nhũm Apraãwja Mekijetek mã mẽ hikukrêxta kwÿ nhõr jao te Rewi mã õr pyràk. Tã nhũm amgrà xohtô nê hapêx nhũm Rewi hkanrêhã htàmnhwÿjaja hapôj nê kêp mẽ õ patre nê ri pa. Jao Mekijetek pyrà nê mẽ kêp mẽ hikukrêx kwÿ jamÿnh o ri pa.

11 Nê finat Mojes na pre Ijaewjê mã tanhmã Rewi hkanrêhã htàmnhwÿjê jarênh to. Kormã mẽ hapôx kêt ri nhũm hkwÿjê mã tanhmã mẽ harênh to. Mẽ kêp patre hã mẽ harê. Tã nhũm mẽ hapôj nê hprêk nê mẽ ho Tirtũm wÿr o ri mẽ hkôt pa. Nom mẽ kot tãm amnhĩ nhĩpêx o pa kaxyw na prem tanhmã mẽ hkrã hto hkêt nê. Tanhmã kot mẽ amnhĩ to nê ã mẽ hipêx anê? Jakamã nhũm Tirtũm mẽ hpãnhã mẽ pahwÿr kÿj rũm mēhõja mẽ nhũm mẽ pahwÿr wrÿ. Nom kêp Rewi hkanrêhã htàmnhwÿ hkêt. Nê mãänên kêp Rewi hpãm Arãw kanrêhã htàmnhwÿ hkêt. Axtem te Mekijetek kot amnhĩ nhĩpêx pyràk xwÿnh na pre. Jejus Krisja. Tãm na pre mẽ pahwÿr wrÿ hãmri nê tanhmã mẽ pahkrã hto pu mẽ ÿ hã tãm amnhĩ nhĩpêx o papa.

12 No Mojes kapêr kot Rewi hkanrêhã htàmnhwÿ pixjaja kêp mẽ ho Tirtũm wÿr xwÿnh ã mẽ harênh. Tã nhũm Krisja mẽ pahwÿr wrÿ nê mẽ hpãnhã kêp mẽ pahto àhwÿr o pa xwÿnh. Jakamã na pu htem axte Mojes kapêr kôt amnhĩ nhĩpêx kêt nê. Pãnhã

Jejus kapêr kôt pix mã amnhĩ nhĩpêx o papa.

¹³⁻¹⁴ Nê Jejus kêp Rewi hkanrêhã htàmnhwỳ hkêt. Katorxà hkôt kêp Apraãw tàmnhwỳ Juta hkanrêhã htàmnhwỳ na pre. Ra mẽ pahte ja mar mex. Aa Juta hkanrêhã htàmnhwỳjaja kêp patre hkêt. Na pre Tĩrtũm jajê mã mẽ kot mẽmoj nhõr xà hã mêsti kunĩhtita ã kãm mẽmoj nhõr nê hkwỳjê ho hwỳr ã mẽ kãm karõ hkêt nê. ãm Apraãw tàmnhwỳ Rewi hkanrêhã htàmnhwỳjê mã pix mã na pre ã mẽ kãm ja hã karõ anê. Tã nhũm Jejus wrỳ nê mẽ hpãnhã mẽ pahto hwỳr o pa. Mẽ uràk nê kêp Rewi hkanrêhã htàmnhwỳ hkêt axtem kêp Juta hkanrêhã htàmnhwỳ htã Rewi hkwỳjê hpãnhã mẽ pahto Tĩrtũm wỳr o pa.

Mekijetek pyrà nê mẽ pahto Tĩrtũm wỳr xwỳnh jarênh

¹⁵⁻¹⁹ Nê Ijaewja na prem Mojes kapêr mar tỳx nê hkôt amnhĩ nhĩpêx tã aa amnhĩ to mex kêt nhũm Tĩrtũm tee ri ja hã mẽ omu nê hamaxpêr o:

—Nà Rewi hkanrêhã htàmnhwỳjaja kêp mẽ õ patre nê mẽ ho ixwỳr o pa htã nhũm mẽ arĩ htỳx ri amnhĩ tomnuj pix o pa. Jakamã koja mẽ axte ri mẽ ho ixwỳr o pa hkêt nê. Anê.

Hãmri nê mẽ pakaxyw mẽ pahto àhwỳr xwỳnhja ta nê ãm. Kra Jejusja nhũm kuta nê ãm. Tãm na hte Rewi hkwỳjê rom tanhmã mẽ pahkrã hto pu mẽ kukwak ri tãm amnhĩ nhĩpêx nê Tĩrtũm kôt amnhĩ nhĩpêx mex nê. Jao nhỹrmã ma mẽ pahte Tĩrtũm nhõ krĩ hwỳr paxàpirja jamār o papa.

Jejus na hte Mekijetek pyrà nê kêp mẽ panhõ patre maati nê mẽ pahto Tĩrtũm wỳr rãhã ho pa. Kêp Rewi hkanrêhã htàmnhwỳ hkêt tã Tĩrtũm pyrà

nê kêp htîr tûm nê pa ho pa xwÿnh jakamã na pre Tîrtûmja mẽ pakaxyw kuta nê mẽ pahwÿr kumê. Kapêr ã kagà htûm kot harênh kot:

Kot kaj Mekijetek pyrà nê mẽ ho ixwÿr rãhã ho ri apa. Anê.

²⁰⁻²¹ No Rewi hkwyjê mã na pre ã kapêr anhÿr kêt nê. ãm Jejus pix mã ã kapêr anê nê kãm:

E kot kaj apê mẽ ho ixwÿr rãhã o apa xwÿnh. Kot paj nhÿrmã apãnhã axtem mēhō xãm kêt nê. ãm kapxipix kot kaj mẽ ho ixwÿr o apa rãhã ho rãhã. ãm hãmri na pa amã ã ixkapêr anê. Ixpê Pahi Maati hã ã ajarênh anê.

²² Anhÿr jao Jejus kot amnhĩ to rax o Rewi hkwyjê jakrenh par ã ho amnhĩrît. Mẽ kot Ijaew mã Tîrtûm kapêr jarênh nhûm mẽ kot mar nom hkôt amnhĩ nhĩpêx kêt jakamã nhûm Tîrtûm mẽ hpãnhã Jejus xãm. Tapxipix na hte tanhmã mẽ pahkrã hto pu mẽ tãm amnhĩ nhĩpêx mex o ri papa. ²³ Rewi hkwyjaja na prem axpên mÿr pê kêp mẽõ patre nê ri pa htã htyk pa nê hapêx. ²⁴ Nom Jejusja htîr tûm nê pa ho pa xwÿnh jakamã koja mẽ uràk nê aa hapêx kêt. Koja mẽ pahto Tîrtûm wÿr rãhã ho pa nê aa jam urer kêt nê. ²⁵ ã Jejus kot amnhĩ nhĩpêx anhÿr jakamã te kêp Tîrtûm wÿr mẽ panhō pry pyràk. Na pu htem hkôt amnhĩ xunhwÿ nhûm mẽ panê mẽ pahte amnhĩ tomnuj piitã rênh pa nê mẽ pahpê Tîrtûm kra hã mẽ pajarê.

²⁶ Nê ãm hãmri kêp mẽ pahto Tîrtûm wÿr xwÿnh maati mex na. Mẽ pakurom tãm kot amnhĩ nhĩpêx mex o pa nê aa kot tanhmã amnhĩ tomnuj to hkêt. Tã ra Tîrtûm kot amnhĩ wÿr ho àpir jakamã nhûm ra kuri mẽ pahto hwÿr rãhã ho pa. ²⁷ Nê kot

amnhĩ to rax o wam mẽõ patre maati jê jakrenh. Wamtaja na prem hkwyjê pyrã nê amnhĩ tomnuj o pa. Jakamã na prem apkati mẽ amnhĩ tomnuj pãnhã Tĩrtũm mã mẽmoj gõ nê kãm amnhĩ jarẽ nê amnhĩ to kuwỳ. Hãmri nê rĩ kormã kot nhãm mẽ hwỳr mẽ mrar xwỳnhjê mã mẽ ho anê nê mẽ hpãnhã Tĩrtũm mã mẽmoj nhõr pẽ mẽ ho kuwỳ. No kêt Jesusja wam patre maati rom aa kot amnhĩ tomnuj kêt jakamã na pre hte mẽ urak nê amnhĩ tomnuj pãnhã Tĩrtũm mã mẽmoj nhõr o pa hkêt nê. ãm mẽ papajaja na pre mẽ pahte amnhĩ tomnuj pãnhã htyk o kãm amnhĩre. ãm htyk tipxi htã mẽ pahpiitã mẽ pahpãnhã amnhĩrer pa. Jakamã koja axte ã amnhĩ nhĩpêx anhỳr kêt nê. Mo kaxyw kot kêt axte mẽ panê ty?

²⁸ Mojes kapêr kôt na pre Ijaew amnhĩm Rewi hkwyjê xunhwỳ nhũm mẽ kêp mẽ õ patre nê ri pa. Tã no nhũm mẽ urak nê arĩ amnhĩ tomnuj o pa nhũm Tĩrtũm tee ri mẽ omu nê mẽ hpãnhã mẽ pakaxyw Krata xãm nê kãm:

—Nà kapxipix mẽ kurom ate tãm amnhĩ nhĩpêx o apa jakamã kapxipix kot kaj mẽ hpãnhã mẽ ho ixwỳr o apa rãhã ho rãhã. Anê.

8

Jejus kêp mẽ pahto Tĩrtũm wỳr xwỳnh maati hã harẽnh

Rukre 22.20; Sikũn Korĩt 3.6-11

¹ E kot paj axtem tanhmã mẽ amã mẽ pahto Tĩrtũm wỳr xwỳnh maati jarẽnh to ka mẽ inhma. Na hte kaxkwa kamã Tĩrtũm nhĩhkô hã hkrĩ. ĩhkô hã kêp Pahi Maati hã hkrĩ xà hã upok rũm hkrĩ ho hkrĩ. ² Wam patre maati jaja na prem Tĩrtũm

nhörkwỹ kaàkre wỳr mra nẽ kamã hitom maati kamã mẽ ho Tĩrtũm wỳr o pa. Nom nhũm Jejus na hte mẽ kurom kaxkwa kamã Tĩrtũm nhörkwỹ mex kãm mẽ pahto àhwỳr o hkrĩ. Örkwỹ kaàkreja na prem ìhkra ho hipêx nom kaxkwa kamã örkwỹ mexja na pre mẽhõ ìhkra ho hipêx kêt nẽ. Tĩrtũm na pre tanhmã hipêx to nhũm kamã Jejusja mẽ pahto hwỳr o hkrĩ.

³ Nẽ mẽ pahpê Ijaew nhõ patre maati jaja na prem mẽ ho hwỳr kaxyw nẽ mẽ kot amnhĩ tomnuj pãnhã Tĩrtũm mã mẽmoj nhõr kôt mẽ ho kuwỳ. No Kris na hte ã amnhĩ nhĩpêx anhỳr kêt nẽ. Ra htyk o kot kãm amnhĩ nhĩ nhõr jakamã na hte wam patre maati pyrã nẽ xatã kãm mẽmoj nhõr kêt nẽ.

⁴ Tã na hte arĩ Ijaew Mojes kapêr kôt amnhĩm Rewi hkwy kêp mẽ õ patre kaxyw mẽ unhwỳ nhũm mẽ ho Tĩrtũm wỳr o pa. No Jejus kêp Rewi hkanrêhã htãmnhwỳ hkêt. Katorxà hkôt kêp Juta hkanrêhã htãmnhwỳ jakamã kop apu arĩ jar pika ja kamã htĩr nẽ pa ronhỹx Ijaew nhõ patre pyrã nẽ kêp mẽ ho Tĩrtũm wỳr o pa xwỳnh kêt. ãm Rewi hkanrêhã htãmnhwỳ pixjaja na htem mẽ kaxyw kãm mẽmoj gõ nẽ hkôt mẽ ho kuwỳ. ⁵ Jar na htem arĩ ã amnhĩ nhĩpêx anhỳr o pa nom kaxkwa kamã na htem ã amnhĩ nhĩpêx anhỳr hkêt nẽ.

Nẽ jar Tĩrtũm nhörkwỹ kaàkreja te kot kaxkwa kamã örkwỹ mexta pyrãk. Na pre Mojes örkwỹ kaàkre nhĩpêx kaxyw nhũm Tĩrtũm tanhmã kãm hã karõ hto nẽ kãm:

—E jãã hixêt prêk nhĩmõk ã axãmta ã na pa pre amã ixkreta kukamã ixprĩ hã tanhmã mẽ ate hipêx to hã amã karõ. Tã kêt ka ã hipêx anẽ. Anẽ.

Hãmri nhũm kuma nê kot kãm hã karõ xà hkôt hipêx. Hãmri nhũm mẽ õ patre maati ixkreja kamã mẽ ho Tĩrtũm wỳr o pa. Na prem ã amnhĩ nhĩpêx anhỹr o pa.

⁶ Tã nhũm ra Tĩrtũm axtem mẽ hpãnhã mẽ pakaxyw Kris xãm nhũm hte mẽ pahto hwỳr mex o wantajê jakre. Na hte kaxkwa kamã mẽ pahpiitã mẽ pahpumunh mex rãhã ho hkrĩ nê wantajê rom tanhmã mẽ pahkrã hto pu mẽ tãm amnhĩ nhĩpêx o ri papa. Tĩrtũm kot finat Mojes mã kapêrja mex nê nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mẽ pahtyk tã akupỹm pahtĩr nê nhỹrmã Tĩrtũm mẽ Jesus wa kuri pamex nê pahtĩr tũm nê papa ho papa nê axte pahtyk kêt nê. ⁷ Kêp apu Tĩrtũm kot Mojes mã kapêr kôt mẽ kot tãm amnhĩ nhĩpêx o pa ronhỹx pre Tĩrtũm axte kapêr nyw ã kagà hkêt nê. ⁸ Nom wam kapêr tũmta na pre mẽ mar tỳx htã arĩ amnhĩ tomnuj rãhã ho pa nhũm tee ri ja hã mẽ omu nê mẽ kãm:

Nà kot paj axte nhỹrmã mẽ apê Ijaew mã axtem tanhmã ixkapêr to.

⁹ Amnepê m mẽ anhĩgêjtê mã na pa pre ixkapêr.

Na pa pre Ejit pê mẽ kator nê mẽ kot tanhmã amnhĩ nhĩpêx to ho pa kaxyw tanhmã hã mẽ kãm karõ hto.

Nom na prem ixkapêr ma nê ãm kuma nê ixkôt amnhĩ nhĩpêx kêt nê. Pa tee ri ja hã mẽ omu hãmri nê mẽ hkaga.

¹⁰ Tã kot paj mẽ apê mẽ hkanrêhã mẽ htãmnhwỳ nywjê mã axtem ixkapêr ka mẽ ixkapêr nywja ma.

Kot paj nhÿrmã tanhmã mẽ akrã hto ka mẽ ixkapêr
nyw mar tÿx nê hã ano htÿx nê ho apa.

Nê akĩnh nê apa.

Nê ixkôt ri amnhĩ nhĩpêx mex o apa.

Nê axpên mã ijarênh o: “Nà ãm hãmri Tĩrtũm kêp
mẽ panhõ Tĩrtũm na.” Anhÿr o ri axpên mã
ijarênh o apa.

Pa amnhĩ tã mẽ ama nê mẽ apumu nê amnhĩ xwar
mẽ apê ixkra hã amnhĩm mẽ ajarê.

11 Kot kaj mẽ apiitã ixte amnhĩ nhĩpêx kôt ix-
pumunh mex o ri apa. Mẽ akàxpore rũnh
xwÿnhjaja nê mẽ akàxpore hkryre xwÿnhjaja
mẽ apiitã ixpumunh mex jakamã kot kaj
mẽ ri axte ixtã tanhmã axpên kukjêr to ho
ri apa hkêr nê.

12 Nê kot paj mẽ ato mex rax o ixpa.

Nê axte tanhmã mẽ ate amnhĩ tomnu hto ho apaja
mã ijamaxpêr kêr nê. Anê.

13 Nê koja mẽmoj ra htũm hãmri nê hapêx tokyx
anê. Ja pyrã nê na pre Tĩrtũm mẽ pamã kapêr tũmta
jarênh o:

—E kêr ka mẽ axte ixkapêr tũm mar kêr nê. Pãnhã
ixkapêr nyw pix mãn mar o apa nê ãm kôt pix mã
mãn amnhĩ nhĩpêx rãhã ho ri apa. Anê.

9

Tĩrtũm nhõrkwÿ kaàkre jarênh

1 Nê amnepêm na pre finat Mojesja mẽ panhĩgêr
nê mẽ pahpãmjê mã tanhmã Tĩrtũm nhõrkwÿ
kaàkre jarênh to. Tanhmã mẽ kot hipêx to nê kamã
tanhmã amnhĩ nhĩpêx to hã mẽ kãm karõ. Nê
kamã tanhmã mẽ kot amnhĩ to Tĩrtũm wÿr to hã

mê kãm karõ. Nê tanhmã mê hkwỳjê ho hwỳr toja nhũm pre mãânên mê kãm hã karõ. No Tĩrtũm nhõrkwỹ kaàkreja kêp õrkwỹ kumrêx kêt. ãm mê kot omunh nê kaxkwa kamã õrkwỹ kumrêx mã hamaxpêr kaxyw na pre. ² Jakamã nhũm prem Mojes kapêr ma nê hipêx. Kamã hitom hamêxkrut. Wam hitom kamã na pre kanê hprêêti xãm nê kutã mêsti xãm. Nê mêsti nhĩmõk ã Tĩrtũm mã õ pãwti jaxwỳ. Mê panhõ patre na pre htem Tĩrtũm mã kugõ nê mêsti ã kãm haxwỳ hãmri nê hkwỳjê ho kuwỳ. Tã hitom ja na prem kêp Tĩrtũm nhõ hitom mex ã harê.

³⁻⁴ Nê hitom wa hkaêx kãm na pre kupêxê ho hakwakre kahê xàja ajêt. Haturxà kamã hitomja na prem Tĩrtũm nhõ hitom maati hã harê. Tĩrtũm na pre te hirã htỳx kãm hwỳr wrỳ nê te kamã hkrĩ pyræk. Nê kamã na pre Tĩrtũm mã mēhkuxwa xà ho xêt xà hã mēs kunĩhtija kuhê. Na prem ôr o hipêx nê kamã ãm nhũm kuhê. Nhũm pre hte mẽõ patre hwỳr agjê nê kutã kuhê nê mê ho Tĩrtũm wỳ. Nê mēs kunĩhti haxwỳja hitom maati kamã kuhê. Na prem pĩ ho hipêx nê ôr o hpro nê kamã ãm. Mēstija kaxwỳnh kãm na pre htem mẽmoj jagjê.

Tĩrtũm kot Ijaew mã tanhmã mê kot amnhĩ nhĩpêx to ho pa hã karõ nê kên po hã mê kãm hã kagàja nhũm prem kamã kuxà nhũm hikwỹ.

Nê mãânên ôr o xijereja xà nhũm hikwỹ. Nê xijere kamã amnepê mã Tĩrtũm kot kaxkwa rũm mê hwỳr mẽõ rênh kwỳ hikwỹ. Mẽõja mê kot kãm: “Manã” anhỹr xwỳnhja na prem hkwỳ hkawrà nê xijere kamã kugjê hãmri nê mêsti kamã kuxà.

Nê finat Arãw nhõ kô kot ho amnhĩ kaxpar xà htũmta nhũm prem kamã kuxà. Tĩrtũm kot tanhmã ho nhũm kurũm pixôrã muxre hapôx xwýnhnta nhũm prem mãânên mês kunĩhti kamã kuxà nhũm hikwỹ.

⁵ Nê himõk ã Tĩrtũm kapêr o wryk xwýnh wa hkarõ nhĩpêxja wa hamêxkrut nê axpên kutã wa hkõn krã ho hkrĩ. Axpên wýr hara koror nê wa hkrĩ. Patre maati kot omunh nê Tĩrtũm kot mẽ hkõt pa ho paja mã hamaxpêr kaxyw. Nê wa hkaêx kãm ahkaprýja Tĩrtũm kot mẽ nê mẽ kot amnhĩ tomnuj rênh mã hamaxpêr xà na pre.

Ã Tĩrtũm nhõrkwỹ kaàkre kot anhýr. No kot paj ixprĩ hã mẽ amã piitã harênh par kêt nê. ⁶ Na pre hte mẽõ patre apkati mẽ wam hitom wýr agjê nê kamã Ijaew ho Tĩrtũm wýr o pa. ⁷ No hitom maatiã ãm mẽ õ patre maati pix na pre hwýr agjê. Nom apkati mẽ hwýr pa nê gjêx kêt ãm amgrà pýnh kãm hwýr gjêx pýnh nê. Nê hwýr gjêx kaxyw nê mẽmo mry pa nê hkamrô ru nê o pa nê hitom maati hwýr ho agjê. Hãmri nê ho mês kunĩhti nhĩmõk kamĩ nê Tĩrtũm mã kãm:

—Pa Tĩrtũm. E ota mry kamrôta. Mẽ ixpê akwýjaja mẽ ixte amnhĩ tomnuj jakamã na pa mẽ amnhĩ pãnhã mẽmo mry nhõkre jakà nê kupĩ nê hkamrô ru nê man awýr o mra. Te kot mẽ ixte amnhĩ tomnuj mýrapê htyk pyræk. Jakamã kwa ã mẽ ixte amnhĩ nhĩpêx anhýrja ã mẽ ixpumunh hkõt mẽ inhnê mẽ ixte amnhĩ tomnuj rê.

Anhýr o mẽ amnhĩ to kuwý. ⁸ Nê patre maati pix na pre hitom maatiã wýr agjê nê mẽ ho Tĩrtũm wý. Ijaew na prem ixkre kapem hamãr o kuhê nê hwýr gjêx kêt nê. Tĩrtũm Karõ kot hã mẽ kãm

karõ xà hkôt. Te Tĩrtũm pê amỳm kuhê pyràk. Tã na htem jarãhã arĩ Ijaew kanrêhã mẽ hkra nẽ mẽ htàmnhwỳjaja ã amnhĩ nhĩpêx anhỳr o pa. Jao mẽ higêtjê pyrà nẽ Tĩrtũm pê amỳm kuhê.

⁹ Mẽ kot arĩ Tĩrtũm mã mry hpar nẽ hkamrô ho mẽmoj kamĩr nẽ amnhĩ to hwỳr o pa htã na htem arĩ hamaxpêr punuj pix o pa.

¹⁰ Tĩrtũm kapêr tũm kot tanhmã mẽmoj tã mẽ kãm karõ hto.

Na pre tanhmã mẽ apkur xà hã mẽ kãm karõ hto nhũm htem pix kur o pa.

Nẽ tanhmã mẽ hkõm xà hã mẽ kãm karõ hto nhũm htem pix o hkõm o pa.

Nẽ tanhmã amnhĩmnuj to hã tanhmã mẽ kot amnhĩ kuhõnh to hã karõja nhũm htem hkôt pix mã tanhmã amnhĩ kuhõnh to ho pa.

Nẽ tanhmã mẽ kot ri mẽ hikukrêx kuhõnh to hã mẽ kãm karõja nhũm htem kôt pix mã tanhmã kuhõnh to ho pa.

Ã na pre Tĩrtũm Kris kukamã mẽ kãm mẽmoj tã karõ rax anẽ. Kris kutêp pix mã ã mẽ kot amnhĩ nhĩpêx anhỳr kaxyw. No mẽ pahte arĩ ã amnhĩ nhĩpêx anhỳr kaxyw kêt. Na pre ra Kris mẽ pahwỳr wrỳ nẽ Tĩrtũm kapêr tũm o hapêx nẽ hpãnhã mẽ pamã kapêr nyw jarẽ pu mẽ hpãnhã nywta kôt pix mã amnhĩ nhĩpêx o papa. Kapêr nywja mex o mex. Nẽ mex o wamta jakrenh.

Kris htyk o mẽ pahte amnhĩ tomnuj pãnhã amnhĩrer ã harênh

¹¹ Tã na pre Krisja tãm mẽ pahwỳr wrỳ nẽ kêp mẽ pahto Tĩrtũm wỳr xwỳnh maati nẽ patre hpãnhã mẽ pahto hwỳr o pa. Nom jar pika ja kamã mẽ kot mẽ ìhkra ho Tĩrtũm nhõrkwỹ kaàkre nhĩpêxta wỳr

àr nê kamã mē pahto hwÿr kaxyw na pre wrÿk kêt nê. Na pre ra akupÿm kaxkwa hwÿr api nê kamã ôrkwÿ mex wÿr axà nê kamã tanhmã mē pahto mex to nê tanhmã mē pahto Tÿrtÿm wÿr to rãhã ho hkrÿ. ¹² ã kaxkwa kamã Tÿrtÿm nhõ hitom maatija wÿr àr tipxi htã mē pahpiitã mē pahte amnhÿ tomnuj pãnhã amnhÿrer pa. Nom mēmo mry kamrô ho mē pahpãnhã amnhÿrer kêt nê. Môx kamrô rÿ motre kamrô ho mē pahpãnhã amnhÿrer kêt nê. Amnhÿ kamrô ho na pre mē pahpãnhã amnhÿre. Tyk nê hkamrô pikapÿrta o mē pahpiitã mē pahpãnhã amnhÿrer pa.

¹³ Nê amnepêm Ijaew kot Tÿrtÿm kapër tÿm kôt amnhÿ nhÿpêx mex o pa hkêt jakamã nhÿm tee ri mē omu nê mē kot amnhÿ tomnuj o mē pa xwÿnh ã mē harê. Jakamã na pre mēõ patre xatã mry kamrô ho mē hkamÿ. Môx kamrô nê motre kamrô ho mē hkamÿ. Na pre môx krare hkwÿ hpa nê ho hxêt nê hprà ho hkwÿjê kamÿ. ã na prem xatã mē hipêx anhÿr o pa. Tÿrtÿm kot ja hã mē omunh nê mē mex ã mē harênh kaxyw. Nom te mē krãhkà pix mex pyrà nê mē hkrã kaxwÿnh kãm arÿ hamaxpër punuj o pa. ¹⁴ ã na prem amnhÿ nhÿpêx anhÿr o pa. Nom Krisja mē kurom aa tanhmã amnhÿ tomnuj to hkêt jakamã na pre mē pahte amnhÿ tomnuj xwÿnhjê nê ty. Te mē kot amnhÿ nê môx rÿ motre hpar nê hkamrô runhta pyræk o amnhÿ nhÿpêx nê mē panê Tÿrtÿm mã amnhÿ gõ nhÿm pre mē kãm hkurê xwÿnhjaja kupÿ. Na pre Tÿrtÿm Karôja ã kot mē panê htyk anhÿr kaxyw tanhmã ho hihtÿx to. Karôja aa hapêx kêt kumrêx rãhã nê pa ho pa xwÿnh jakamã na pre Kris tykja kukamã tanhmã ho hihtÿx to nhÿm mē panê ty.

Tapxipix na mẽ pahte tãm amnhĩ nhĩpêx o papa kaxyw kêp tanhmã mẽ pahkrã hto xwỳnh. Jakamã na pu htem ra pajamaxpêr nyw o pajamaxpêr o papa nê pajamaxpêr o:

—Na pa pre tee ri inhmã amnhĩ krã hkôt tãm amnhĩ nhĩpêx o ixpa hprãm kaprỳ nê ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã harênh ma nê amnhĩ kaxyw hkôt ijamaxpêr tỳx nê nhũm amnhĩ tã ixpumu nê ixte tãm amnhĩ nhĩpêx o ixpa kaxyw ixãm. Jakamã kot paj ãm Tĩrtũm pix mã kãm tanhmã amnhĩ nhĩpêx to ho ri ixpa. Tĩr rãhã nê pa ho pa xwỳnh jakamã kot paj nhỹrmã kuri uràk nê ixtĩr tũm nê ixpa ho ixpa. Anê.

¹⁵ Nê amnepê mã na prem piitã Tĩrtũm kapêr tũm kôt amnhĩ nhĩpêx mex o pa hkêt nê. Mẽ kot xatã hkôt amnhĩ nhĩpêx o pa hã amnhĩ jarênh tã hkôt amnhĩ nhĩpêx kêt nê. Jakamã na pre Kris wrỳ nê mẽ pahte hkôt amnhĩ xunhwỳr mã xwỳnhjê mã Tĩrtũm kapêr nyw jarê nê mẽ pamã:

—Kot paj mẽ anê ty nhũm Tĩrtũm ã ixte amnhĩ nhĩpêx anhỹrja kukwak ri mẽ ato mex rãhã ho pa. Anê.

Hãmri nê amnhĩ jarênh xà hkôt mẽ pahte amnhĩ tomnuj piitã hpãnhã amnhĩrer kaxyw mẽ panê ty. ¹⁶⁻¹⁷ Te jar pika ja kamã mēhō htyk kukamã hkrajê mã tanhmã amnhĩ jarênh to pyràk. Na htem htyk kaxyw nê hkrajê mã:

—Nà kot paj mẽmo arĩgro hã ty ka mẽ inhmỳr pê ixpê ixkukrêx kwỳ o arĩk.

Anhỹr o na htem amnhĩ jarê. Hãmri nê ty nhũm hkrajaja amnhĩm ò mẽmoj to àrĩk pa. Mẽ hipêêxà kukwak ri mẽ hikukrêx mex nê mỳr pê o pa. No

kormã htîr ri nhũm mẽ kormã kêp hamÿnh kêt nê. Ja pyrã nê na pre Tîrtũmja Jejus htyk kukwak ri tanhmã mẽ pahto mex to pu mẽ kukwak ri mẽ pamex nê pahkînh nê ri papa.

¹⁸ Nê Tîrtũm kapêr tũm kôt na pre hte mẽ õ patre mry pa nê ãm hkamrô runh kôt pix mã mẽ ho Tîrtũm wÿr o pa nhũm amnhĩ tã mẽ omunh xà hkôt mẽ kuma nê tanhmã mẽ ho mex to.

¹⁹ Na pre finat Mojesja Ijaew mã Tîrtũm kapêr tũm piitã harê nê harênh pa hãmri nê môt xpi nê kaxyw motre hõxpĩ. Hãmri nê xijere kamã hamê wa hkamrô runh pa nê kamã gô hkwy ru. Hãmri nê kaxyw mẽmo pĩ hpa hkryre pê “isop” jarênhja kwÿ kukê. Nê kaxyw ôwêhti hkĩ kamrêkre hkwy hpy nê isop mẽ ho pihkàr pa nê mry kamrô o go. Hãmri nê ho hkwyjê kamĩ. Nê ho Tîrtũm kapêr ã kagã tũmta kamĩ. ²⁰⁻²² Hãmri nê ho anhÿr pa nê mẽ kãm:

—Nà na Tîrtũmja ixte mry kamrô ho mẽ akamîr pumunh kôt mẽ pamã kapêr o: “E kot kaj mẽ ixkapêr kôt amnhĩ nhîpêx o ri apa hã kot paj tanhmã mẽ ato mex to rãhã ho ri ixpa ka mẽ amex nê akînh nê ajamakêtkati nê ri apa. Jakamã kêr ka mẽ mry kamrô ho mẽmoj piitã hkamîr pa. Nê ho amnhĩ kamĩ. Kêr pa ja hã mẽ apumu hãmri nê axte tanhmã mẽ ate amnhĩ tomnuj tota mã ijamaxpêr kêt nê.” Anê. ã na Tîrtũm mẽ pamã kapêr anê. Anê.

Hãmri nê hpãnhã mry kamrôta o ôrkwy kaàkre kamĩ. Nê hkre kamã mẽmoj kuhê xwÿnh piitã nhũm ho hkamîr pa. ã na pre mẽ õ patre mẽ mex kaxyw mẽ hipêx anhÿr o pa. Mẽ kot tãhã mẽmoj to hpÿnhre nê ho hkamîr kêt jakamã kironhÿx pre mẽmoj piitã ã hipêx anhÿr o pa. Kop apu mẽ kot

mry hpar nê hkamrô runh kêt ronhÿx pre Tĩrtũm arĩ mẽ kot amnhĩ tomnuj mã hamaxpěr rãhã ho pa.

²³ Na prem ã Tĩrtũm nhõrkwÿ kaàkre kamã mẽmoj kuhê xwÿnh piitã mex kaxyw hipêx anê. Te Tĩrtũm kot mẽ pahto mex nhũm mẽ pahte nhÿrmã ma kaxkwa hwÿr õ krĩ hwÿr paxàpirta pyrà nê. Nom mẽ kot mry hpar nê hkamrô runhta kukwak ri mẽ pamex nê papa hkêt. ãm mẽhõ kamrô kukwak ri mẽ pamex xwÿnhhta pix kukwak ri na mẽ pahpê pahĩr tũm nê papa mã xwÿnh. Ja na mex o mry kamrô piitã hakrenh pa. ²⁴ Jejus Krisja pix kukwak ri. Tãm na pre patre pyrà nê mẽ pahto Tĩrtũm wÿr kaxyw mẽ ìhkra ho Tĩrtũm nhõrkwÿ kaàkre nhĩpêxta wÿr gjêx kêt nê. ãm ixkre kaàkre pix na pre. Na pre kaxkwa kamã Tĩrtũm nhõ krĩ hwÿr axà. Tã arĩ kamã Tĩrtũm nhĩhkô hã mẽ pahto hwÿr rãhã ho hkrĩ.

²⁵ Nê Ijaew nhõ patre maati na hte amgrà mẽ õrkwÿ kaàkre kamã hitom maati hwÿr gjêx tipxi. Nê amnhĩ kôt mry kamrô ru nê ho agjê. Tĩrtũm kot hã omunh nê axte mẽ kot amnhĩ tomnuj mã hamaxpěr hkêt kaxyw. Nom Kris na pre mẽ uràk nê mẽmo mry pa nê Tĩrtũm mã hkamrô kapĩr kêt nê. Kamrô na pre mẽ panê axkapĩ. Nom patre pyrà nê amgrà mẽ ã amnhĩ nhĩpêx anhÿr kêt nê. Na pre htyk o Tĩrtũm mã amnhĩ nhõr tipxi. ²⁶ Kêp apu patre pyrà nê amgrà mẽ mẽ panê htyk o pa ronhÿx ra mẽ panê htyk xohtô rax kumrêx. Nhÿx pre amnepê mã Tĩrtũm kot mẽmoj piitã ho katorta rũm amgrà mẽ mẽ panê htyk o pa ho hkraax. Jao xatã htyk o amgrà xohtô rax kumrêx. Nom ja kot

anhÿr kêt. Na pre mẽ pahwÿr wrÿn mẽ mẽ panê htyk tipxi htã htykja o mẽ pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

²⁷ ãm pahtyk tipxi htã koja Tĩrtũm nhÿrmã akupÿm mẽ pahpiitã mẽ pahto pahtĩr mẽ ahpÿnhã tanhmã mẽ pajarênh to mẽ ahpÿnhã tanhmã mẽ panhĩpêx to. Kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. ²⁸Ja pyrã mẽ na pre Krisja ãm mẽ panê htyk tipxi htã mẽ pahto ohtô mẽ mẽ panê mẽ pahte amnhĩ tomnuj piitã rênh pa. Hãmri nhũm Tĩrtũm akupÿm ho htĩr mẽ akupÿm amnhĩ wÿr ho api. Tã koja nhÿrmã akupÿn mẽ pahwÿr wrÿ. Nom axte mẽ pahte amnhĩ tomnuj pãnhã amnhĩ rer kaxyw mẽ panê htyk kaxyw wrÿk kêt mẽ. Ra kot mẽ pahte amnhĩ tomnuj pãnhã amnhĩrer kênã. Koja akupÿn wrÿ mẽ mẽ pahte amnhĩ wÿr kamã pajamak o papa xwÿnhjaja ma akupÿm amnhĩ kôt kaxkwa hwÿr mẽ pahto àpir pa. Ra mẽ pahtyk tã nhũm akupÿm mẽ pahto mẽ pahtĩr mẽ ma amnhĩ kôt mẽ pahto àpir pa pu mẽ kuri pamex mẽ pahtĩr tũm mẽ papa ho papa.

10

Kris kot mẽ panê htyk tipxi hã harênh

¹ Nẽ arĩ mẽ kot Tĩrtũm kapêr tũm kôt amnhĩ nhĩpêx o mẽ pa xwÿnhjaja kormã hprĩ hã Tĩrtũm kot tanhmã mẽ pahto mex to hã harênh mar tÿx kêt. Na prem kormã hkwy pix ma. Na hte mẽ õ patreja amgrã mẽ kãnhmã kaxkwa hwÿr mry kamrôta pẽ mẽ mẽ amnhĩ to Tĩrtũm wÿ. Kot ja hã mẽ omunh mẽ axte mẽ kot amnhĩ tomnuj mã hamaxpêr hkêt

kaxyw. Tã ã mẽ kot amnhĩ nhĩpêx anhÿr tã arĩ Tĩrtũm kapêr kwÿm amnhĩ nhĩpêx rãhã ² jakamã na prem xatã kãm mẽmo mry kamrô runh o pa. Kêp apu tãm amnhĩ nhĩpêx nê tãm ri hamaxpêr ronhÿx arĩ ã amnhĩ nhĩpêx anhÿr o pa hkêt nê. Nê xatã amnhĩ pãnhã mry hpar nê hkamrô ho Tĩrtũm nhõrkwÿ kaakre kamã mẽmoj kamĩr kêt nê. ³ Nom na prem tãm amnhĩ nhĩpêx o pa hkêt nê. Mẽ kot amgrã mẽ Tĩrtũm kot mẽ nê mẽ kot amnhĩ tomnuj rênh kaxyw mẽ kot kãm mẽmo mry hpar o pa htã no ãm hkôt amnhĩ nhĩpêx xwÿnh ã amnhĩ jarênh kêt nê. Arĩ mẽ kot amnhĩ tomnuj o pa jakamã na prem mry hparta ã amnhĩ pumu nê tee ri amnhĩ kukamã hamaxpêr o hkaprĩ nê pa. ⁴ Nom na hte môx kamrô rÿ motre kamrôja mẽ panê mẽ pahte amnhĩ tomnuj rênh kêt nê. ⁵⁻⁸ Jakamã na pre Krisja mẽ pahwÿr nojarêt nê Tĩrtũm mã amnhĩ jarênh o: Pa Tĩrtũm? E kot paj ma mẽ hwÿr wrÿ.

Mẽ kot amnhĩ pãnhã amã mry hparta apê hprãm nõkati nê amã hkĩnh kêt.

Ate mẽ nê mẽ kot amnhĩ tomnuj rênh kaxyw mẽ kot amã mẽmo mry hparta amã hprãm kêt. ãm ixkukamã na ka pre ã mẽ kot amnhĩ nhĩpêx anhÿr kaxyw mẽ kãm ja hã karõ.

Mẽ kot mry nhĩpêx o te pa ixte mẽ nê ixtyk nê ixkamrô pikapĩr pyrãk o na prem ixkukamã ã amnhĩ nhĩpêx anê.

Jakamã na ka ra mẽ kaxyw inhmã inhĩ gõ pa mẽ urãk nê inhĩ ho inhĩ.

Tã kot paj ma mẽ hwÿr wrÿ. Ixte amã hprãm xà hkôt pix mã ixte tanhmã amã mnhĩ nhĩpêx to ho ixpa kaxyw. Akapêr ã kagà htũm kot

tanhmã ixkukamã ijarênh to xà hkôt kot wrỳ nê ã amã amnhĩ nhĩpêx anê. Anê.

Hãmri nê man mẽ pahwỳr wrỳ. ⁹ Kot Tĩrtũm kapêr tũm o hapêx par nê hpãnhã tãm mẽ panê htyk kaxyw wrỳ. Jakamã na pre nojarêt nê Tĩrtũm mã amnhĩ jarênh o:

—E ixte amã hprãm xà hkôt amnhĩ nhĩpêx kaxyw kot paj ma mẽ hwỳr wrỳ.

¹⁰ Anhỳr jakamã wrỳ nê Tĩrtũm kãm hprãm xà hkôt mẽ panê ty. Na pre nhãm mēhõ mẽ kãm hkurê xwỳnhjê mã òr nhũm mẽ kot hpĩr nhũm amarĩ htyk kêt nê. Na pre amnhĩ grõnh kôt mẽ kãm amnhĩ gõ nhũm prem kupĩ. Hãmri nhũm htyk o mẽ pahte hkôt amnhĩ xunhwỳr xwỳnhjê o Tĩrtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

¹¹ Nê mẽ ò patrejaja na htem apkati mẽ Tĩrtũm nhõrkwỹ kaakre kamã kãm tanhmã amnhĩ nhĩpêx to. Nê apkati mẽ hkwỳjê hpãnhã mry hkwỳ hpa nê hkamrô ru nê mẽ ho Tĩrtũm wỳ. Tã nom ja hã mẽ omunh xà hkôt mẽ nê mẽ kot amnhĩ tomnuj rênh kêt nê. ¹² No kêt Kris na pre mẽ kot xatã mry hpar xwỳnhhta rom ãm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nê ma akupỹm kaxkwa hwỳr api nê Tĩrtũm nhĩhkô hã Pahi Maati hkrĩ xà kamã upôk rũm hkrĩ ho hkrĩ. ¹³ Koja kuri hkrĩ rãhã nhũm Tĩrtũmja ìhkram mẽ kot kutã amnhĩ xunhwỳr xwỳnhjê jaxàr pa. Ja kaxyw na kormã kuri hamãr o hkrĩ. ¹⁴ ãm htyk tipxi htã htykja o mẽ pahte hkôt amnhĩ xunhwỳr xwỳnhjê ho Tĩrtũm kra pu mẽ ra hpãnhã tãm amnhĩ nhĩpêx rãhã ho papa. Nê pajamaxpêr mex o ri

papa. Tĩrtũm kãm hprãm xà hkôt.

¹⁵ Amnepê mē kot Tĩrtũm nhỹ hã kapēr jarēnh o mē pa xwýnhjaja na prem mē panhĩgētjē mã kapēr o pa. Tĩrtũm Karõ nhỹ hã mē kãm kapēr nē mē kãm:

¹⁶ —E na Tĩrtũm mē pamã amnhĩ jarē nē amnhĩ jarēnh o:

Kot paj nhỹrmã axtem ixkapēr nyw o mē amã ixkapēr.

Nē mē akrãm hagjē ka mē mar tỳx pē hã ano htỳx nē ho apa.

Ixkapēr tũm na pa pre mē amã kēn pota ã hã kagà. Nom ixkapēr nyw kot paj axtem mē akrãm hagjē.

¹⁷ Nē kot paj axte mē ate amnhĩ tomnuj mã ijamaxpēr kêt nē.

Anhỹr o mē pamã amnhĩ jarēnh. Anē.

¹⁸ Tã ra axte mē pahte amnhĩ tomnuj mã hamaxpēr kêt ã kot amnhĩ jarēnh jakamã mo kaxyw kot pu mē arĩ amnhĩ pãnhã kãm mēmo mry hpar nē hkamrô runh o papa? Tã mē pahkwỳjaja na hte arĩ kãm ja ho anhỹr prãm o pa. E kwa mē axte ã amnhĩ nhĩpêx anhỹr kêt nē ixkwỳjaja.

Akupỹm mē pahte amnhĩ nhĩpêx tũm o paxujanãr kêt ã mē pamã karõ

Matêwre 27.51; Rukre 23.45; Rõmãn 5.1-2; Epes 3.12; Eprêw 4.14-16

¹⁹⁻²⁰ E ixkrãmnhwỳjaja. Ra Jejus kot mē panê htyk o hkamrô pikapĩr jakamã na pu htem arĩ tee ri amnhĩ kukamã pajamaxpēr hkêt nē. Tĩrtũm axte kot mē pahte amnhĩ tomnuj mã hamaxpēr kêt jakamã na pu htem paxãmnhĩx amnhĩ to hwỳr o papa. Te paxãmnhĩx õrkwỹ kaàkre kamã hitom

maati hwÿr pagjêx nê kamã amnhĩ to hwÿrta pyræk. Jao ra mẽ papamjaja amnhĩ to hwÿr o papa nhũm patre axte mẽ pahto hwÿr kêt nê. Jejus na pre htyk o mẽ pamã hitom maati wÿr hakwakre kahêxà hã kupêxêja kôt ã ho axkjê. Jao mẽ paxàmnhĩx hwÿr mẽ pagjêx kaxyw mẽ pamã kahê xà mẽ. ²¹ Tã ra kêp Tĩrtũm nhõ krĩ kamã mẽ pahto hwÿr xwÿnh maati na. Nê mex kumrêx o jar pika ja kamã patre kot mẽ ho hwÿr o pa xwÿnhnta jakrenh. ²² Jakamã e kwa kêr pu mẽ mãmri paxàmnhĩx amnhĩ to Tĩrtũm wÿr o papa. Ra Jejus kot mẽ panê htyk nhũm mẽ pahte amnhĩ kaxyw hkôt pajamaxpêr rãhã ho papa jakamã kêr pu mẽ axte mẽ pahpê amnhĩ tomnuj xwÿnh ã amnhĩ jarênh kêt nê. Kêr pu mẽ nhÿrmã tanhmã pajamaxpêr punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkapri kamã amnhĩ to Tĩrtũm wÿr kurê kumrêx. Jejus ra kot mẽ pahte amnhĩ tomnuj pãnhã amnhĩrer par jakamã kot puj mẽ Tĩrtũm mã tanhmã mẽ pahte amnhĩ tomnuj to hã amnhĩ jarê nhũm mẽ pama nê axte kãm hamaxpêr kêt nê. Pu mẽ te paxwÿr nê pahte amnhĩ nê pagrã htyk kuhõnh par nê akupÿm pamex pyræk. Nê axte paxàmnhĩx amnhĩ to Tĩrtũm wÿr o papa.

²³ Nê mẽ kot Kris ã tanhmã mẽ pahto htã kwa kêr pu mẽ tee ri amnhĩ kukamã pajamaxpêr kêt nê. Rÿ pajamaxpêr o:

—Konên. Koja mẽ tanhmã hamaxpêr to nê Kris ã ixpĩ rÿ ko. Pa apu mẽ kot ixpĩr pymaj akupÿm ixte amnhĩ nhĩpêx tũm o awjanã nê akupÿm hkôt amnhĩ nhĩpêx japêr rÿ ko. Anê.

Kwa pu mẽ tee ri ã pajamaxpêr anhÿr hkêt nê. Pu kêt mẽ pajamaxpêr o:

—Nà mẽ kot Kris ã tanhmã ixto htã kot paj aa hkaga hkêt nê. Mẽ kot hã ixpîr mã tâ kot paj hkaga hkêt kumrêx.

Anhÿr ã amnhĩ jarê. ²⁴ Nê kêr ka mẽ akwÿjê mã anê kê mẽ mẽmoj to axpên kutã nojarêr rãhã ho ri axpên kôt pa. Jao tanhmã axpên to mex to o ri axpên kôt pa.

²⁵ Na pre ra mẽ pahkwÿjaja tanhmã hamaxpêr to nê axte mẽ pahkôt pikuprõnh nê Tĩrtũm kapêr mar o hkrĩ hkêt nê. No kêr pu mẽ ho mẽ uràk kêt nê. Kêr pu mẽ arĩ xatã axpên wÿr akuprõ nê mẽ pahte tee ri amnhĩ kukamã pajamaxpêr nê axpên mã pakapêr o papa. Kêt mẽ panhõ Pahihtija ra akupÿn mẽ pahwÿr wrÿk kaxyw jakamã kwa kêr pu mẽ kutêp arĩ axpên mã pajamaxpêr mex nhõr pê tãm axpên nhĩpêx mex rãhã ho i papa.

²⁶ Mẽ pahkwÿjaja kot Tĩrtũm kapêr mar mex tâ na htem kuma nê ãm kuma. Kwa kêr ka mẽ ho mẽ uràk kêt nê. Kris kot mẽ panê htyk ã harênhja mẽ kot mar mex tâ na htem kuma nê ãm kuma nê hkaga kumrêx. Jakamã mēhõ koja Kris pyrã nê htyk o mẽ kot amnhĩ tomnuj pãnhã amnhĩre? Nà amrakati kumrêx. ãm Jejus pix na pre Tĩrtũm ja kaxyw ãm. Tapxipix na pre ã mẽ panê amnhĩ nhĩpêx anê. Tã nhũm mẽ kot hkagaja mÿrapê koja mẽ nhÿrmã mẽ tãmjaja mẽ kot amnhĩ tomnuj pãnhã amnhĩre. ²⁷ Mẽ kot Tĩrtũm kutã amnhĩ xunhwÿr xwÿnh na mẽ. Amnepêr na pre Tĩrtũm mẽ kot kutã amnhĩ xunhwÿr xwÿnhjê kaxyw mẽ kot amnhĩ xà htÿx kamã hamak tũm xàta nhĩpêx. Tã ra mẽ kot Jejus kaga jakamã koja nhÿrmã ma hwÿr

mê rênh pa nhũm mê tee ri kãm hwÿr pa hprãm kêt kaprÿ. ²⁸ Amnepêm finat Mojesja kormã htÿr ri na pre hte mēhō pixi nē kapēr kaga nē akupÿm kot amnhĩ nhĩpêx tũm o awjanã nē tanhmã amnhĩ tomnuj to nhũm hkwÿjaja ja hã omu. Tanhmãn axkrut rÿ axkrunēpxi nē ja hã omu. Hãmri nē ma Mojes wÿr mra nē axpēn kôt kãm tanhmã kot amnhĩ tomnuj to hã harē. Hãmri nhũm harēnh ma nē mê kãm hã amÿnē nhũm tee ri kãm htÿr prãm kaprÿ. Mê kot akupÿm amnhĩ nhĩpêx tũm o ujanār nē amnhĩ tomnuj o paja mÿrapê na prem mê kupa. ã na pre htem mê hipêx anhÿr o pa.

²⁹ Nē koja mēhō tanhmã Tĩrtũm Kra Jejus o kapēr punuj to. Tĩrtũm kapēr ã kagã htũm kot ra mê kot kēp Tĩrtũm Kra hã harēnh mar mex tã axtem nē tanhmã ho kapēr punuj to ho pa. Kot mê panē htyk nē hkamrô pikapĩr kôt kot mê pahte amnhĩ tomnuj pãnhã amnhĩrer ã harēnh mar tã kuma nē ãm kuma nē harēnh o:

—Nà mê pahpyrà nē kot amnhĩ tomnuj xwÿnh nhũm mê kot hã hpĩr kēnã. Na pre mê panē htyk kêt nē.

Anhÿr ã harē. Nē Tĩrtũm Karōja nhũm määnēn tanhmã ho kapēr punuj to. Kēp mê pakutã nojarēt xwÿnh tã nhũm axtem nē tanhmã ho kapēr punuj to. Mÿrapê koja nhÿrmã Tĩrtũm tanhmã homnuj tÿx to. Homnuj tÿx o mê kot Mojes kapēr kaga nhũm mÿrapê kot mê hparta jakre. Jakamã kwa kēr ka mê ã amnhĩ nhĩpêx anhÿr hkêt nē. ³⁰ Tĩrtũm kapēr ã kagã htũm kot ja jarēnh kot:

Ixpê Tĩrtũm kot paj mê kot amnhĩ tomnuj xwÿnhjê homnuj tÿx nē. Anē.

Nē mê kot tãm amnhĩ nhĩpêx xwÿnhjê jarēnh kot:

Mê kot amnhĩ to mex o mẽ pa xwỳnhjaja kot paj nhỹrmã mẽ ho mex rax nẽ. No mẽ kot amnhĩ tomnuj o mẽ pa xwỳnhjaja kot paj nhỹrmã mẽ homnuj tỳx nẽ. Anẽ.

Ra mẽ pahte ã kapêr anhỹr xwỳnhja kot amnhĩ nhĩpêx ã omunh mex. ³¹ Jakamã kwa mẽ okora. Kêr ka mẽ amnhĩ to mex rãhã ho ri apa. Tĩrtũm rãhã ho rãhã nẽ hihtỳx o hihtỳx jakamã koja mẽmoj tã akamã gryk ka amex kêt o amex kêt.

³² Nẽ amnepêm mẽ ate Jejus kôt amnhĩ xunhwỳr krax kãm na prem Jejus ã mẽ atomnuj tỳx tã ka prem mẽ umaj hkaga hkêt nẽ. Tã kêr ka mẽ arĩ ã amnhĩ nhĩpêx anhỹrja kukamã mãn ajamaxpêr nẽ hã anohtỳx rãhã ho apa. Jao arĩ ã amnhĩ nhĩpêx anẽ nẽ mẽ umaj Jejus kaga hkêt nẽ. ³³ Na prem mẽ piitã mẽ noo mã tanhmã mẽ amã kapêr punuj to nẽ tanhmã mẽ anhĩpêx to. Nẽ tũhã tanhmã mẽ akwỳjê homnuj tỳx to ka mẽ tee ri ja hã mẽ omu nẽ mẽ kamã axukaprĩ nẽ. Nẽ mẽ hkôt axkamẽ nhũm prem mã mẽ ato anẽ nẽ. ³⁴ Na prem mẽ akwỳjê jagjê ka prem ja hã mẽ omu nẽ ma mẽ hagjênh xã hã ixkre hwỳr mẽ hwỳr mra nẽ tanhmã mẽ ho mex to. Nhũm prem mẽ apê mẽ akukrêx kwỳptã nẽ ma amnhĩm o pa ka mẽ ãm amnhĩ tã mẽ omu nẽ ajamaxpêr o:

—Kwãr mẽ mãmrĩ ma amnhĩm hamỳn o pa. Koja nhỹrmã Tĩrtũm inhmã ixkukrêx mex o kot ja jakrenhta kwỳ nhõr rax nẽ pa amnhĩm hamỳ nhũm aa ixpê hapêx kêt nẽ. Hãmri nhũm axte mẽhõ aa ixpê utàr kêt nẽ. Jar mẽ ixkukrêxta mexti hã. Anẽ.

Jao mẽ kot mẽ apê utàr tã ka mẽ akaprĩ nã apa hkêt nẽ. ã amnhĩ kukamã ajamaxpêr anhỹr pẽ

akĩnh nê apa. Ām hāmri na ka prem ã amnhĩ kukamã ajamaxpêr anê. ³⁵ Na ka prem mẽ kutã amnhĩ to htỳx kãm ã apa anê. Tã kwa kêr ka mẽ arĩ ã amnhĩ nhĩpêx anhỹr o ri apa. Kêr kê nhỹrmã Tĩrtũm ja hã mẽ ato mex rax nê.

³⁶ Nê kêr ka mẽ arĩ amnhĩ kaxyw Tĩrtũm mã ajamaxpêr rãhã ho ri apa. Mẽ kot Jejus ã tanhmã mẽ ato htã ka mẽ hkaga hkêt nê. Kot kaj mẽ ã amnhĩ nhĩpêx anhỹr o apa nhũm Tĩrtũm ja hã mẽ apumu nhũm ja kãm mex nê. Hāmri nhũm ra kot amnhĩ jarênh xà hkôt nhỹrmã amã mẽmoj mex nhõr rax nê. Jakamã kwa mẽ kot tanhmã mẽ anhĩpêx to hã amnhĩ pumu nê tee ri amnhĩ kukamã ajamaxpêr o ri akaprí hkêt nê. Kot kaj mẽ Kris ã apunuj rãhã apa hkêt nê. ³⁷ Tĩrtũm kapêr ã kagà htũm kot Jejus jarênh kot:

Koja mẽ pahwỳr wrỳk mã xwỳnhta tokyx wrỳ. Na ra wrỳk kaxyw nojarêt. Anê.

³⁸ Nê harênh kot:

Ixkôt mẽ kot amnhĩ nhĩpêx mex o mẽ pa xwỳnhjaja koja mẽ amnhĩ kaxyw ixkôt hamaxpêr tỳx rãhã nê. Jao nhỹrmã ixri htĩr tũm nê mex rãhã nê pa ho pa.

Nê koja mẽhõ ixkaga pa tee ri kãm ixkĩnh kêt ã omu. Anê.

³⁹ No mẽ papajaja te mẽ pahte mẽ kot Jejus kaga nhũm kot amnhĩ tã mẽ homnuj mã xwỳnhjê pyrãk kêt. Arĩ mẽ pahte amnhĩ kaxyw hkôt pajamaxpêr rãhã jakamã koja nhỹrmã amnhĩ wỳr mẽ pahto api.

11

Amnhĩ kaxyw Tĩrtũm kôt mẽ hamaxpêr mex

*xwÿnhjê jarênh**Sikûn Pêtre 3.5-7*

¹ Nê na htem Kris ã mē panhîpêx kati ho pa pu mē pahpunuj rãhã nê ri papa. Te Kris kot mē pahto mex kêt pyrãk pu htem mēmoj punuj pix kãm ri papa nê kormã Tirtûm kot mē pahto mex ã amnhî tã omunh kêt nê. Tã ã mē pahte anhÿr tã kwa kêr pu mē arî kapêr kôt amnhî nhîpêx rãhã ho papa. Mē pahte pano ho Tirtûm pumunh kêt tã kot mē pahkôt pa ho pa hã amnhî kaxyw kãm pajamxpêr tÿx rãhã ho papa. Jakamã na pu htem ãm kapêr kôt pix mã amnhî nhîpêx o papa. ² Amnepê mã mē pakukamã mē panhîgêjtjaja na prem no ho Tirtûm pumunh kêt tã amnhî kaxyw kãm hamaxpêr nê kapêr kôt amnhî nhîpêx o pa nhûm amnhî tã mē omu nhûm ja kãm mex nê.

³ Nê mē papajaja na pu htem pajaxwÿja mē pano ho omunh kêt tã amnhîm harênh o:

—Nà amnepê mēmoj piitã amrakati ri nhûm Tirtûm ãm kapêr pix o mēmoj piitã ho kato. Ixte inhno ho ja hã omunh kêt tã kot ã amnhî nhîpêx anhÿr ã amnhî jarênhja jakamã kot paj hkôt ijamaxpêr tÿx rãhã ho ri ixpa. Anê.

⁴ Na pre finat Atãw nhîpêx nê kaxyw hprõ Ewa nhîpêx. Hãmri nhûm wa hkra Apewja htõ Kaï rom amnhî kaxyw Tirtûm kôt hamaxpêr tÿx o pa. Jakamã nhûm wa Tirtûm mã mēmoj gõ. Nhûm Apew kot Kaï rom Tirtûm kãm hprãm xã hkôt kãm mēmoj nhõr jakamã nhûm amnhî tã omu nê kot amnhî to mex xwÿnh ã harê nê kot kãm õr xwÿnhnta nhûm mex ã harê. Tã Apew amnepê htyk tã pu htem arî harênh mar rãhã ho papa nê kãm pajamaxpêr o:

—Apew na pre hte amnhĩ kaxyw Tĩrtũm kôt hamaxpêr tỳx rãhã ho pa.

Anhỹr ã kãm pajamaxpêr.

⁵ Nê Atãw kanrêhã htãmnhwỳ Enokja na pre haxwỳja amnhĩ kaxyw Tĩrtũm mã hamaxpêr tỳx o pa. Jao hkamnàr rom kãm hprãm xà hkôt pix mã tanhmã kãm amnhĩ nhĩpêx to ho pa nhũm amnhĩ tã omu nê amnhĩm mex ã harê. Jakamã na pre htyk kêt nê. Na pre Tĩrtũm htĩr rãhã ma amnhĩ wỳr ho api nhũm hkwỳjaja tee ri hapêr o pa. Jakamã na pu htem arĩ axpên mã Enok kot amnhĩ kaxyw Tĩrtũm kôt hamaxpêr mex o pa hã harênh o papa.

⁶ Mẽ kot amnhĩ kaxyw Tĩrtũm mã mẽ hamaxpêr kêt xwỳnhjaja na hte Tĩrtũm mẽ mex ã mẽ harênh kêt nê. Tã mẽ papajaja kêr pu mẽ Enok pyrà nê amnhĩ kaxyw kãm pajamaxpêr tỳx rãhã ho papa. Nê pajamaxpêr o:

—Tĩrtũmja htĩr rãhã ho rãhã. Kojã nhỹrmã mẽ ixte amnhĩ kaxyw hkôt ijamaxpêr xwỳnhjê ho mex rax nê. Nà kojã mẽ ixto anê.

Anhỹr o mẽ pajamaxpêr nhũm Tĩrtũm amnhĩ tã mẽ pajamaxpêr ã mẽ pahpumu nê mẽ pahte amnhĩ to mex ã mẽ pajarê. No mẽ kot amnhĩ kaxyw kãm hamaxpêr kêt xwỳnhjaja na hte ã mẽ harênh anhỹr kêt nê.

⁷ Nê Enok kanrêhã htãmnhwỳ Noehtija na pre haxwỳja amnhĩ kaxyw Tĩrtũm mã hamaxpêr tỳx o pa. Jao hkamnàr rom amnhĩm pàr raxja nhĩpêx. Na pre ra Tĩrtũm na rax kukamã tanhmã kãm ujarênh to. Kormã aa na wrỳk nhũm Nohti kot omunh kêt tã Tĩrtũm kapêr ma nê mar xà hkôt amnhĩm pàr rax kumrêxta nhĩpêx. Õrkwỹ kamã

hkwÿjê mē mē amnhīm hipêx. No mē kot Tīrtūm kapêr mar nē ãm mar xwÿnhjaja na pre Tīrtūm gô tàm o mē hanhi nē mē himex pa. Nom Noehtija nhūm kot amnhī to mex xwÿnh ã harê. Kot amnhī kaxyw hkôt hamaxpêr rāhã ho pa jakamã nhūm pre ã mex ã harēnh anē.

⁸ Nē Noehi kanrêhã htàmnhwÿ Apraãwja na pre haxwÿja amnhī kaxyw Tīrtūm mã hamaxpêr tÿx o pa. Na pre Tīrtūm kot kãm pika nhôr ã kãm amnhī jarē nē ra kot ma hwÿr mēnh kaxyw. Hãmri nhūm Apraãw kuma nē hkamnàr rom ò pika kaga nē ma pika hōja wÿr pa. Aa kot ma hwÿr mōr nē omunh kêt tã Tīrtūm kapêr mar xà hkôt ò pika kaga nē ma hwÿr pa ho pa. ⁹ Hãmri nē hwÿr pōj nē omu nhūm Tīrtūm kãm:

—E pika ja kot paj nhÿrmã akanrêhã akra nē atàmnhwÿjê mã kugõ. Anē.

Hãmri nhūm kuma nē pikaja kamã pa ho pa. Ra kamã axtem mē uro hkwÿjaja ri pa nhūm Tīrtūm kormã mē kator kêt ri nhūm mē ò pika hwÿr pōj nē mē kamã pa ho pa. Nom amnhīm òrkwÿ mex nhīpêx kêt nē. Kormã kêp ò pika kumrêx kêt ã hkamnhīx jakamã ãm mry kà o ixkre nhīpêx nē kamã pa ho pa. Nē nhÿhÿm pa kaxyw nē kugrà nē ma amnhī kôt o pa. Amnhī kaxyw Tīrtūm mã hamaxpêr rāhã jakamã ã amnhī nhīpêx anhÿr o pa.

Nē Apraãw kra Ijak nē htàmnhwÿ Jakoja wa Apraãw pyrã nē mry kà ho òrkwÿ nē ma amnhī kôt o pa. Nhūm Tīrtūm kot Apraãw mã kapêr pyrã nē wa kãm wa hkanrêhã wa hkra nē wa htàmnhwÿjê mã pika nhôr ã amnhī kukamã wa kãm amnhī jarē. ¹⁰ Jakamã nhūm Apraãw kormã Tīrtūm nhõ

krî hwÿr àpir xa hã amnhĩ tã hamãr pê kot ho õ pika mã xwÿnhjê kamã pa ho pa. Kaxkwa hwÿr àpir mã xwÿnhjta mex kumrêx. Tĩrtũm kot hipêx jakamã koja mry kà ho ixkre nhĩpêxta rom aa hapêx kêt nê. Jakamã nhũm Apraãw mẽ pahpyrà nê ma kot hwÿr àpir xa hã amnhĩ tã Tĩrtũm jamãr rãhã ho pa. ¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhũm hprõ Sara haxwÿja hpigêx tÿx nê. Kamrõ hkêt ã amgrã xohtõ rax kumrêx. Nhũm wa aa hkra hkêt nê pa htã nhũm Tĩrtũm nhÿrmã wa hkra hã wa kãm awjarê nhũm wa kuma nê amnhĩ kaxyw hkõt hamaxpêr kurê kumrêx. Nom amnhĩ tã kuma nê tee ri amnhĩ kukamã hamaxpêr hkêt nê. Na pre wa kuma nê axpên mã:

—Nà kot puj xep hãmri tã pahkra. Tĩrtũm kot hã ã pajarênh anhÿr kênã. Anê.

Tã ã wa kot hkra kaxyw Tĩrtũm mã hamaxpêr anhÿr jakamã na pre Apraãwja hprõ htu. Ra wa hamê hpigêt tÿx kumrêx tã nhũm htu. Nhũm wa hkra Ijakja gaa nê wa kãm kato. Jakamã nhũm wa gaa nê rĩ wa hkanrêhã wa htãmnhwÿ xohtõ rax o ohtõ rax. Ohtõ ho kaxkwa kamã kanhêti xohtõ jakre. Nê ohtõ ho gõ xujanãr mÿri pikahti grã hkryre jakre. Jakamã nhũm mẽ tee ri mẽ ho kõta hpar mã. Nhũm Apraãw kêp mẽ hpàr krax. ¹³ Tã nhũm Apraãw nê Ijak nê Jakoja mẽ ri pa tãmtã nê htyk pa nê hapêx. Tĩrtũm kormã kot mẽ kãm pika jarênhjta nhõr xwÿj ri ra htyk pa. Nom kormã mẽ htĩr ri tanhmã kãm hamaxpêr to nê hamaxpêr o:

—Nà kormã Tĩrtũm kot mẽ inhmã pika jarênhja nhõr kêt tã koja nhÿrmã inhmÿr pê ixkanrêhã ixkra nê ixtãmnhwÿjê mã kugõ. Nà koja mẽ kãm

kugõ. Ra kot hã inhmã amnhĩ jarēnh kēnã kot kêt mē kãm õr kêt.

Anhÿr o kaxyw kãm hamaxpēr rãhã ho pa. Jao hkĩnh nē hamaxpēr o:

—Nà inhõ krĩja axtem na. Na pa hte jar pika ja kamã ri mē hkõt ri ixpa. Te ixpê mē uro pyrã nē ri mē hkõt ixpa nom jar inhõ krĩ hkêt. Inhõ krĩ na kêt axte mã. Anē.

¹⁴⁻¹⁵ Na prem ã õ krĩ hõ hkukamã hamaxpēr anhÿr o pa. No õ krĩ htũmta mē kot hkaga nē pika hõ hwÿr mõr xwÿnhnta na prem ã harēnh anhÿr kêt nē. Kop apu mē kot amnhĩm tãm mãn jarēnh ronhÿx prem awjanã nē ma akupÿm hwÿr pa. Na prem axtem krĩ hõ jarē nē kormã hwÿr mõr kêt ã amnhĩ jarēnh o pa. ¹⁶ Tã nhÿ krĩ na prem ã harēnh anē? Nà kaxkwa kamã Tĩrtũm nhõ krĩja. Tãm na mex kumrēx jakamã nhũm prem kormã hwÿr ma àpir xa hã mē pahpyrà nē amnhĩ tã Tĩrtũm jamãr rãhã ho pa nhũm amnhĩ tã mē omu nē hkĩnh nē. Nē mē kot tãm amnhĩ nhĩpêx ã mē omu nē mē kēp hkra hã mē harēnh ã hpijaàm kêt nē. Hãmri nē mē kutēp tanhmã õ krĩ ho mex to ho pa.

¹⁷⁻¹⁸ Na pre ra tanhmã Apraãw mã hkra Ijakja jarēnh to nē kãm:

—Akra Ijak kanrēhã hkra nē htãmnhwÿjaja koja mē kēp ixkra. Anē.

Tã ra kot amnhĩ tã Apraãw kamã hamak kaxyw hkukamã hamaxpēr nē hamaxpēr o:

—Xà we Apraãw kãm ixkĩnh tÿx kumrēx nē kãm ixkõt amnhĩ nhĩpêx rãhã ho pa hprãm nà? Xà we kãm ixkĩnh tÿx o hkrata jakrenh? E pa kop we ja hã amnhĩ tã kamã ama nē omu mãn. Anē.

Hāmri nê kot hkra hpîr nê kām òr ã kām karõ. Hāmri nhũm kuma nê ra kot kām hpîr kaxyw. Kot Tîrtũm kot amnhĩ nhĩpêx ã omunh mex jakamã hkamnàr rom kot kām hpîr kaxyw.
¹⁹ Nê hamaxpêr o:

—Nà Tîrtũm akupỹm kot mē ho htîr xwýnh kênã.

Anhỹr jakamã kām hkra hpîr puma hkêt nê ra kot kām hpîr mã tâ nhũm Tîrtũm amnhĩ tâ omu nê nê kām kapêr nhũm kuma nê hpîr kêt nê wa ma akupỹm òrkwỹ hwýr mō. Tã ã kot hkra nhĩpêx anhỹr jakamã Apraãw mã te Ijak htyk nê akupỹm htîr pyræk.

²⁰ Nê Ijakja na pre haxwýja amnhĩ kaxyw Tîrtũm mã hamaxpêr tỳx o pa. Jao hkamnàr rom amnhĩ kra wa kām Tîrtũm kot wa ho mex kukamã wa kām harê. Kra Jako mē Ejauta wa kām harê nê wa kām:

—E koja nhỹrmã Tîrtũm inhmýr pê war ato mex rãhã ho pa. Anê.

²¹ Nê Jakoja na pre haxwýja amnhĩ kaxyw Tîrtũm mã hamaxpêr tỳx o pa. Jao hkamnàr rom hkra Juje mã Tîrtũm kot mē ho mex kukamã harê. Na pre Jakoja hkra nê htàmnhwý mē hpimràatã hprãm xàj ma Ejit wýr pa nê kamã pa ho pa. Tã nhũm Jako hpigêt tỳx nê ra htyk kaxyw. Hāmri nê hkra Juje mē hkra wa mē kām kapêr nê mē kām:

—E na pa tee amnhĩ kamã ama. Na pa ra ixtyk kaxyw. Nom koja Tîrtũm nhỹrmã inhmýr pê mē ato mex rax nê. Anê.

Hāmri nê amnhĩ kaxpar xà hã pĩ hã amnhĩ kaxpa nê kànhmã xa nê Tîrtũm mã mex o mex ã harê. Hāmri nê akupỹm nōr xà kamã nōn ty.

²² Nê Jujeja na pre haxwýja amnhĩ kaxyw Tîrtũm mã hamaxpêr tỳx o pa. Jao htyk kaxyw nê

hkamnàr rom hkwỳjê mã tanhmã amnhĩ jarēnh to. Ra hpigêt nē htyk kaxyw nē hkwỳjê mã tanhmã amnhĩ tã karō hto nē mē kām:

—E na pa ra ixyk kaxyw. Tã koja Tĩrtũm inhmỳr pē nhỹrmã Ejit rũm mē akator nē ma akupỹm mē panhō pika hwỳr mē ato pa. Ra kot mē panhĩgêt Apraãw mã amnhĩ jarēnh xà hkôt. Jakamã kwa mē inhma. Kêr ka mē akupỹm anojarêt nē ma amnhĩ kôt ixtã kasãwja mỳ nē amnhĩ kôt ixto mō. Hãmri nē mũtar mē panhō pika kamã mē anhō krĩ htã ijaxà pa jawỳ mē akuri ixtã pyka. Anē.

²³ Nē Mojes katorxà mē hipêêxàja na pre wa haxwỳja jajê pyrà nē amnhĩ kaxyw Tĩrtũm mã hamaxpêr tỳx o pa. Juje hkanrêhã htãmnhwỳ na pre wa. Jakamã nhũm Ejit nhō pahija tee ri Ijaew xohtô rax kumrêx ã mē omu nhũm ja kêp omnuj nē. Hãmri nhũm mē hkra myjaja mē hapôx kôt mē hamỳnh xwỳnhjaja kot mē hpar ã mē kām karō. Tã nhũm Mojes kato nhũm hipêêxà mē katorxàja wa omu nhũm muxre nhũm wa tee ri hkukamã hamaxpêr. Hãmri nē pahi Paraohti mã mē hkra jamỳnh xwỳnh kot wa kêp hpĩr pymaj ho pimxur o hã mytwrỳ axkrunêpxi. Tĩrtũm kamnàr rom wa amnhĩ tã kām uma hkêt nē ã kêp hkra ho hpimxur anē.

²⁴ Nē Mojes na pre haxwỳja amnhĩ kaxyw Tĩrtũm mã hamaxpêr tỳx o pa. Kormã karàre ri na pre Paraohti hkra nija omu nē amnhĩm kumỳ nē ho hkra nē amnhĩ kôt o pa. Rãhã nhũm àptàr nhũm Ejit nhō xwỳnhjaja kêp pahi Paraohti htãmnhwỳ hã axpên mã harê. Hãmri nhũm tee ri amnhĩ tã mē kuma nē amnhĩ tã mē kām aprã nē mē kām:

—Kwa mẽ ã ijarênh anhÿr kêt nê. Ixpê mẽ akwÿ hkêt. Anê.

²⁵ ãm kãm Tĩrtũm kwÿjê kôt pix mã ri pa ho pa hprãm. Nê kãm Ejit nhõ pahi hkôt amnhĩ tomnuj prãm kêt nê. ãm mẽ kot amnhĩ tomnuj pix o paja na mẽ kãm hprãm nhũm ja hã mẽ omu nê tee ri mẽ hkukamã hamaxpêr nê hamaxpêr o:

—Nà kot paj mẽ hkôt ri ixpa hkêt kumrêx. Mẽ hkĩnh nê pa htã koja mẽ gaa nê ty nhũm mẽ hkĩnhja mẽ kêp hapêx. Nà kot paj Tĩrtũm kwÿjê hkôt mãn ri ixpa ho ixpa. Mẽ kot Tĩrtũm ã mẽ inhĩpêx kati htã pa arĩ mẽ hkôt ixpa ho ixpa. ²⁶ Inhmã Ejit nhõ xwÿnhjê hkôt ixkukrêx rax nê ri ixpa hprãm kêt. Kwâr mẽ mãmrĩ Tĩrtũm ã tanhmã inhĩpêx to. Koja mẽ ã inhĩpêx anê pa ixpunuj nê ri ixpa htã koja Tĩrtũm nhÿrmã ixto mex rax nê. Nà kot paj Ejit nhõ pahihtĩ hkôt ri ixpa hkêt nê.

Anhÿr jao ra mẽ pahpyrà nê Kris gryk ã mẽ hkaga. ²⁷ Tã akupÿm mẽõ pika hwÿr Ijaewjê ho mör kaxyw nhũm Ejit nhõ pahihtija tee ri ja hã omu nê kamã gryk tÿx nê. No nhũm Mojesja amnhĩ kaxyw Tĩrtũm kôt hamaxpêr tÿx o hkamnàr rom kãm mẽ uma hkêt nê. Nê mẽ kêp hkwyjê kator pa nê ma akupÿm mẽõ pika hwÿr amnhĩ kôt mẽ o pa. Tĩrtũm kamnàr rom ã mẽ kêp mẽ ho kator anê. Aa kot no ho omunh kêt tã amnhĩ kaxyw kãm hamaxpêr tÿx nê hkamnàr rom mẽ kator nê hamakêtkati nê mẽ o pa. ²⁸ Nê hkamnàr rom mẽ hkĩnh ã arĩgro mẽ kot kãm “Pas” anhÿr xwÿnhhta ho hkrax. Kormã Ejit rùm kator kêt ri. Nê kaxyw amnhĩ kwÿjê mã hã karõ nê mẽ kãm:

—E pa mẽ amã Tĩrtũm kapêr jarê ka mẽ inhma. Nà kot puj xep mẽ jarãhã ôwêhti hkwy pa nê

hkamrô ru. Nê hkamrô ho panhōrkwỹ jakwakre hã pĩ kukō. Hãmri nê ĩ kuxôt nê kuku. Koja kamàt nhũm mẽ kot amnhĩ tomnuj xwỹnhjê pê mẽ hkra my kot wa piitã mẽ hpar mã xwỹnhja mō. Hãmri nê mẽ pamỳ ri mō nê ã mẽ pahte mẽ panhōrkwỹ nhĩpêx anhỹrja ã omu nê tanhmã mẽ pahkrajê ho hkêt nê. Tĩrtũmja ã mẽ pahte amnhĩ nhĩpêx anhỹr kaxyw ã inhmã karō anê. Jakamã e pu mẽ hkamnâr rom ã amnhĩ nhĩpêx anê kê mẽ pahkrajaja mẽ pahpê htyk kêt nê. Anê.

Hãmri nê ã mẽ kot Ejit rũm kator xà hã arĩgrota ã mẽ hkĩnh o kator krax anê. Mẽ hkĩnhja na htem kãm “Pas” anê.

²⁹ Nê Ijaewjaja na prem haxwỳja Ejit rũm kormã Mojes kôt mẽ pa ri uràk nê amnhĩ kaxyw Tĩrtũm mã hamaxpêr. Jakamã na prem ra gô xujanâr pê “Gô Kamrêk” anhỹr xwỹnhja mỳ ri kuhê nhũm Tĩrtũm mẽ kãm ho axkjê. Nê mẽ kãm hkôt ã ho amgrà nhũm mẽ hã hkamnâr rom mex nê rêr pa. No nhũm mẽ hkôt mẽ kot mẽ himex kaxyw mẽ mrar xwỹnhjaja. Ejit nhõ pōristijaja nhũm gōja akupỹm mẽ hã axkamur nê mẽ himex pa.

³⁰⁻³¹ Nê Ijaew kot Mojes mỳr pê Jojue hkôt pa ri mẽ uràk nê amnhĩ kaxyw Tĩrtũm kôt hamaxpêr o pa. Na prem ra Tĩrtũm kot mẽ kãm pika nhõr xwỹnhhta wỳr pōj nhũm Tĩrtũm krĩ pê Jeriko hwỳr mẽ kurê. Mẽ kot kamã mẽ pa xwỹnhjê utàr kaxyw mẽ hwỳr mẽ kurê. Mẽõ krĩ pu hã kahêja kên tỳx pix o na pre. Nê hprêk rax kumrêx. Nê krĩ nhõ xwỹnhjaja kãm Tĩrtũm kapêr mar prãm kêt. Hãmri nhũm Tĩrtũm mẽ hã Ijaewjê mã amỹnê nê mẽ kãm:

—E mẽõ krĩja kot paj mẽ amã kugō nom kêr ka mẽ inhmar kumrêx. Kêr ka mẽ apkati mẽ mẽ õ krĩ

hwÿr mra nê kupu hpÿnh o atã apkati kêp 7 nê rî ma akupÿm mra. Anê.

Hâmri nhÿm mē kuma nē mar xà hkôt ma Jeriko hwÿr mra. Hâmri nē hwÿr pøj nē Tirtÿm kamnàr rom krî puhã kahêja kupu hpÿnh o hã apkati kêp 7. Hâmri nhÿm apkati pê 7ta ã nhÿm kên tÿx o kahêja mē kêp amnhî krakra nē rôrôk pa. Nhÿm mē mra nē hkôt krî hwÿr agjê nē krî nhô xwÿnhjê nhîmex pa. Nom krî kamã kuprÿ pê Raapja Ijaew pyrã nē amnhî kaxyw Tirtÿm mã hamaxpêr o pa jakamã nhÿm mē kormã mē himex kaxyw mē hwÿr môr kêt ri amnhî kukamã mē hkwyjaja kot mē hã ukapi ho pa kaxyw mē hwÿr mē kurê. Hâmri nhÿm Raapja mē kêp amnhî pyrã nē Tirtÿm kôt hamaxpêr ã mē omu nē hkwy kot mē himex pymaj amnhî nhôrkwÿ kamã mē kêp mē ho amÿxu nhÿm mē hkà hkînh pê ma akupÿm hkwyjê wÿr mō. Jakamã nhÿm mē kot mē himex kaxyw mē hwÿr mra hãmri nē amnhî pyrã nē tanhmã Raap mē ô fãmii ho hkêt nhÿm mē arî htîr nē pa. Mē urak nē amnhî kaxyw Tirtÿm kôt hamaxpêr o pa hã omunh xà hkôt tanhmã mē ho hkêt nē.

³² ã na pre mē kot amnhî kaxyw Tirtÿm kôt mē hamaxpêr xwÿnhjaja Tirtÿm kamnàr rom amnhî nhîpêx anhÿr o pa. Nom jajê pixjaja na prem ã amnhî nhîpêx anhÿr hkêt nē. Määnên Giteaw nē Parak nē Sãsô nē Jepte nē Tawi nē Sãmuew nē Tirtÿm nhÿ hã mē kapêr o pa xwÿnhjaja. Jajê piitã na prem wantajê pyrã nē amnhî kaxyw Tirtÿm kôt hamaxpêr tÿx rãhã ho pa. Nom kot paj ixprî hã tanhmã mē kot hkamnàr rom amnhî nhîpêx to hã mē harênh kêt nē. Kot pa anê nē tokyx harênh par kêt nē. Mē ohtô rax kumrêx jakamã na pa ãm

hkwỳ pix jarē nē hā kagà.

³³ Na prem hkwỳjaja Tĩrtũm kamnàr rom ma mē kot amnhĩ tomnuj xwỳnhjê nhõ krĩ hwỳr mra nē mē kēp mē õ pika pytà. Nē mē hkwỳjaja Tĩrtũm kamnàr rom mē ho amnhĩptàr mex o pa. Nhũm prem kãm Tĩrtũm kurê xwỳnhjaja mē hkwỳjê pyné nē ahkrehti kamã mry xoprê hkwỳ nhĩpy mē kurê. Nhũm prem amnhĩ tã mē omu nē amnhĩ kaxyw Tĩrtũm mã hamaxpěr kurê kumrêx nhũm amnhĩ tã mē omu mē nê te mry jakwa ho pikamỳr tỳx pyràk o mē hipêx nhũm ãm mē omunh o kuhê nē tanhmã mē ho hkêt nē. ã na prem Tĩrtũm kamnàr rom amnhĩ nhĩpêx anhỳr o pa.

³⁴ Nhũm mē kot kuwy rax kãm mē hkwỳjê rēnh tã nhũm mē kot amnhĩ kaxyw Tĩrtũm mã hamaxpěr tỳx nhũm amnhĩ tã mē omu nē mē nê tanhmã kuwy ho nhũm mē hxêt kêt nē. Nhũm pre mē hkwỳjaja wapo ho mē hkamnhwỳr o mē hkwỳjê hpar kaxyw nhũm mē amnhĩ kaxyw Tĩrtũm mã hamaxpěr nhũm amnhĩ tã mē omu nē mē nê tanhmã mē ho nhũm mē amnhĩ rê nē mē umaj hprõt nē ma mra. Mē hihtỳx kêt tã Tĩrtũm kamnàr rom ý hã hihtỳx nē mē kãm mē hkurê xwỳnhjê ho krihkrit pa nhũm mē ma akupỹm hapêx.

³⁵ Nē mēni hkwỳjaja na prem haxwỳja amnhĩ kaxyw Tĩrtũm mã hamaxpěr tỳx o pa. Jao mē hkra-jaja mē kēp htyk tã nhũm prem Tĩrtũm kamnàr rom mē ho kuwy nhũm mē kuma nē akupỹm mē kãm mē ho htĩr.

ã na prem amnhĩ kaxyw Tĩrtũm mã hamaxpěr pē mex nē pa anē. No na pre mē hkwỳjaja mē uràk nē amnhĩ kaxyw kãm hamaxpěr tỳx tã nhũm

Tĩrtũm tokyx mẽ ho mex kêt nẽ. Na pre mẽ kãm mẽ hkurê xwỳnhjaja Tĩrtũm ã mẽ par kaxyw. Nẽ mẽ hkwỳjaja Tĩrtũm ã mẽ hipêx kati ho pa nhũm mẽ amnhĩ xà htỳx kãm hamak kãm ty. Nhũm mẽ himex kaxyw nẽ mẽ kãm:

—Kwa mẽ Tĩrtũm kaga. Kot kaj mẽ hkaga pa mẽ amã inhũre nẽ mẽ anhĩmex kêt nẽ. Anẽ.

No nhũm mẽ kuma nẽ ãm mẽ kuma nẽ amnhĩ kaxyw kãm hamaxpêr tỳx pẽ mẽ kãm:

—Nà mẽ kam nẽ mãmrī ixpĩ. Inhmã ixtyk pyma hkêt. Kot paj ty nhũm Tĩrtũm akupỹm ixtõ ixtĩr pa kuri inhmex kumrêx nẽ ri ixtĩr tũm nẽ ixpa ho ixpa.

Anhỹr o mẽ kãm amnhĩ jarẽnh jakamã hãmri Tĩrtũm kaga hkêt rãhã nhũm mẽ himex.

³⁶ Nẽ mẽ kãm mẽ hkurê xwỳnhjaja na prem Kris ã mẽ hkwỳjê mã hpêr o pikênh pẽ mẽ htak xà ho mẽ htak rũnh o pa. Nẽ kãx o mẽ hkwỳjê hpa hpre nẽ mẽ hte hpre nhũm mẽ kêp prês nẽ hkrĩ ho hkrĩ.

³⁷⁻³⁸ Nhũm prem kẽn rũnh o mẽ hkwỳjê htak o mẽ kupa. Nẽ mẽ hayr o mẽ hkwỳjê pa. Nẽ mẽ hkamnhwỳr o mẽ hkwỳjê pa. ã na prem Kris kôt mẽ hamaxpêr ã mẽ omunh xà hkôt mẽ hipêx anhỹr o pa. Jakamã na pre mẽ hkwỳjaja mẽ umaj mẽõ krĩ rũm hapôj nẽ ma hprôt nẽ mra. Nẽ te mẽ õ krĩ hkêt pyrà nẽ kapôt ã kêp amrakati nẽ ri pa. Mẽ ê hkêt nẽ ôwêhti hkà ho ê nẽ ri hã pa. Nẽ motre kà ho amnhĩ pre nẽ ri hã pa. Nẽ kẽn prêk ã api nẽ kre kamã hpimxur o pa. Nẽ pika hkre kamã hpimxur o pa. Nhũm mẽ kãm mẽ hkurê xwỳnhjaja te mẽ kêp ahpunu nẽ mẽ kêp ahkro pyràk o mẽ hipêx nẽ axpẽn mã mẽ harẽnh o:

—Nà mẽ mexti hã. Kwa pu mẽ piitã mẽ himex paa ri.

Anhÿr o mẽ harënh tã nhũm Tĩrtũm mẽ uràk nẽ ã mẽ harënh anhÿr kêt nẽ. Na pre mẽ mex kumrêx ã mẽ harẽ. Nẽ nhÿrmã kuri mẽ mex nẽ pa ho pa hkukamã mẽ harẽ.

³⁹ ã na prem Tĩrtũm kamnàr rom mẽ kãm mẽ hkurê xwÿnhjê kutã amnhĩ to htÿx kãm htyk o pa anẽ. Nhũm Tĩrtũm ja hã mẽ omu nẽ hkĩnh nẽ kãm mẽ hapê htÿx nẽ. No nhũm mẽ kormã htĩr ri amnhĩm Tĩrtũm kot mẽ ho mex xà jamÿnh kêt rãhã ty. ⁴⁰ Tã mo na pre Tĩrtũm kormã mẽ htĩr ri hkwyjê pyrà nẽ mẽ ho mex kêt nẽ? Nà na pre kormã mẽ hkukamã hamaxpêr o:

—Nà kot paj kormã mẽ ho mex kêt nẽ. Kot pa mẽ mÿr pê mẽ kot ixkôt amnhĩ xunhwÿr mã xwÿnhjê jamãr grire mãn. Kêr pa inhõ krĩ kamã mẽ ho ixpimràatã mẽ ho mex rax kumrêx. Nà kot paj ã mẽ ho mex anẽ. Ja na kêt inhmã mex o kormã mẽ htĩr ri ixte mẽ ho mexta jakrenh. Anẽ.

Ja o ra ã mẽ papajaja mẽ pakukamã hamaxpêr anẽ.

12

Mẽ pahte Jejus pyrà nẽ mẽmoj kutã amnhĩ to htÿx ã mẽ pamã karõ

Piripos 3.12-21

¹ Na pre mẽ pakukamã mẽ panhĩgêt kwÿjaja amnhĩ kaxyw Tĩrtũm mã hamaxpêr pê ã amnhĩ xà htÿx kamã hamak o pa anẽ. Tã te ra mẽ kot kÿj rũm kaxkwa rũm mẽ pahpumunh nẽ tanhmã mẽ pamã kapêr to pyrà nẽ mẽ pamã kapêr o:

—E mẽ inhma mẽ ixkanrêhã mẽ ixtàmnhwỳjaja. Na pa prem ã Tĩrtũm kamnàr rom amnhĩ nhĩpêx o ixpa anê. Mẽ kot ja hã mẽ inhĩpêx kati htã pa prem Jejus kaga hkêt nê. Tã kêr ka mẽ ixpyrà nê ã mẽ kãm mẽ akurê xwỳnhjê kutã amnhĩ to htỳx anê. Nê mẽ ixpyrà nê amnhĩ kaxyw Tĩrtũm kôt pix mã ajamaxpêr tỳx rãhã ho ri apa. Anê.

Jakamã kwa kêr pu mẽ uràk nê ã amnhĩ nhĩpêx anhỳr rãhã ho mãn ri papa. Te mẽ hprôt xwỳnhjaja kot amnhĩ nhĩpêx pyràk o amnhĩ nhĩpêx. Na htem hprôt tỳx kaxyw mẽmoj pytĩ jamỳnh nê ho hprôt hkêt nê. Na htem ỹ kamã hprôt o hprôt tỳx nê wam hkwỳjê mã wa nê mra. Ja pyrà nê kêr pu mẽ pahte Tĩrtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx. Mẽ pahte amnhĩ tomnuj o papa xàja te mex pyràk no ãm mex kêt. Te ho mẽ hprôt xwỳnh kot axtem nê mẽmoj pytĩ mỳnh nê tee ri ho hprôt tỳxta pyràk. Kot puj mẽ tanhmã amnhĩ tomnuj to ho papa nê Tĩrtũm kapêr kôt amnhĩ nhĩpêx mex kêt nê. Jakamã kwa kêr pu mẽ Tĩrtũm kapêr gryk ã amnhĩ tomnuj nê amnhĩ to htỳx rãhã ho papa. Te ho mẽ hprôt nê nhỹri mẽ àhuk xà pix kukamã hamaxpêr rãhã hprôt tỳx xwỳnhhta pyrà nê ãm Jejus mã pajamaxpêr tỳx rãhã ho papa.

² E kot paj mẽ amã Jejus kot tanhmã mẽ panê amnhĩ nhĩpêx toja jarê ka mẽ inhma. Nã kot mẽ panê mẽ pahte amnhĩ tomnuj pãnhã amnhĩrer kaxyw htyk nhũm mẽ pahte hkôt amnhĩ xunhwỳr jakamã na hte mẽ pamã pajamaxpêr nyw gō pu mẽ amnhĩ kaxyw hkôt pajamaxpêr ho ri papa. Na pre mẽ kãm hkurê xwỳnhjaja kot pĩ kahpa hã nhôr

nê hpîr mã nhũm mẽ kutã mẽ kãm amnhĩ to htỳx nê arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tĩrtũm kaga hkêt nê. Na pre hamaxpêr o:

—Nà kwãr mẽ mãmrĩ ixpĩ. Kot paj ty nhũm Inhĩpêêxà akupỹm ixto ixtĩr pa kuri inhmex kumrêx nê ixtĩr tũm nê ixpa ho ixpa. Anê.

Tã na ra kaxkwa kamã Tĩrtũm xupôk rũm mex nê hkrĩ ho hkrĩ. ³ Jakamã kwa kêr pu mẽ kot ã mẽ panê amnhĩ nhĩpêx anhỹrja mã pajamaxpêr rãhã ho ri papa. Mẽ kot hipêx kati htã nhũm mẽ kutã amnhĩ to htỳx nê xa. Tã kêr pu mẽ urak nê mẽ kãm mẽ pahkurê xwỳnhjê kutã amnhĩ to htỳx rãhã ri papa. Jao tee ri amnhĩ kukamã pajamaxpêr o mẽ umaj Tĩrtũm kaga hkêt nê.

⁴ Na ka htem ma mẽ kot amnhĩ tomnuj xwỳnhjê hwỳr mra nê mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwỳjê nhĩpêxta pyrà nê kormã mẽ atõxpĩr kêt nê.

*Tĩrtũm kot tanhmã hkrajê nhĩpêx to hã harênh
Juãw 15.1-2; Eprêw 5.7-8; Xiakre 1.2-4*

⁵ Nê mãn ka mẽ arĩ Tĩrtũm kapêr ã kagã htũm kwỳ hã ano htỳx japêr. Mẽ pahpê Tĩrtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nê mẽ amã kapêr ka mẽ ama nê mar tỳx nê mẽmojta kaga kurê kumrêx. No mẽ ama nê tee ri kot nê akurê xwỳnhhta kukamã ajamaxpêr o ri akaprĩ o axtem nê Tĩrtũm

kaga hkêt nê. Ama nê kot amã mẽmoj nê kapêr xwÿnhhta kaga kurê kumrêx.

⁶ Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nê hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anê. Anê.

⁷ Jakamã kot kaj mẽ tanhmã amnhĩ tomnuj toja mÿrapê tanhmã apunuj kute nê ri apa htã no ãm tee ri amnhĩ kukamã ajamaxpêr hkêt nê. Kêt mẽ ãm ajamaxpêr o:

—Nà ixte tãm amnhĩ nhĩpêx kaxyw na Tĩrtũm ã inhĩpêx anê. Ixpê hkra hã ixte amnhĩ to mex o ixpa prãm xàj ã inhĩpêx anê.

Anhÿr o mãn kêt ajamaxpêr. Na hte mẽ hipêêxà mẽ hkra kot amnhĩ to mex kaxyw ã mẽ hipêx anê. Tã Tĩrtũm na hte mẽ uràk nê ã mẽ panhĩpêx anê.

⁸ No koja mēhō hkra kot tanhmã amnhĩ tomnuj to hã omu nê ãm omu nê hã tanhmã ho hkêt nê. Hã koja hkraja te hipêêxà hkêt nê hã awrãre nê ri pa pyràk. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nê hã tanhmã mẽ pahto. Nom mẽ kêp hkra hkêt xwÿnhjaja nhũm hte ja hã mẽ omu nê ãm hã mẽ omu nê hã kormã tanhmã mẽ hipêx to hkêt nê.

⁹ Nê na hte mẽ panhĩpêêxà mẽmoj tã mẽ pamã karō pu htem kuma nê hkôt amnhĩ nhĩpêx. Ja mex. Nom kaxkwa kamã Mẽpahpãm maatija mẽ pahte mar nê hkôt amnhĩ nhĩpêxja na kêt mex kumrêx.

Kot puj mẽ ã amnhĩ nhĩpêx anê nê nhỹrmã kuri pamex nê pahtĩr tũm nê papa ho papa.

¹⁰ Nê mẽhprĩre na htem hamaakro nhũm mẽ hipêêxà tanhmã hã mẽ ho. Hã mẽ hkaprêprêk rỳ hã mẽ kãm akir. Amnhĩ krã hkôt tanhmã mẽ hipêx to. Mẽ kot ja hã amnhĩ pumunh nê axte hkêt kaxyw. Ja mex. Tã mẽ papajaja. Mẽ pahpê Tĩrtũm kra na pu htem tũhã tanhmã amnhĩ tomnuj to nhũm mẽ pahpumu nê tanhmã hã mẽ pahto. Mẽ pahte amnhĩ pumunh nê axte hkêt kaxyw. Uràk nê amnhĩ to mex pix o papa kaxyw.

¹¹ Na hte mẽmoj tã tanhmã mẽ panhĩpêx to pu mẽ tee ri amnhĩ pumu nê pahkaprĩ nê pahkĩnh kêt nê ri papa. Nom kot puj mẽ tokyx tanhmã amnhĩ tomnuj tota kaga nê akupỹm Tĩrtũm kôt tãm amnhĩ nhĩpêx o papa nê akupỹm pahkĩnh nê pajamakêtkati nê ri papa.

Mẽ pahte Tĩrtũm kaga hkêt ã mẽ pamã karõ

¹² Jakamã e kwa kêr ka mẽ amnhĩ to htỳx nê apa. Mẽ kot Kris ã tanhmã mẽ anhĩpêx to htãã. ãm Tĩrtũm kôt pix mã amnhĩ nhĩpêx mex pê akĩnh nê apa. ¹³ Kêr kê Kris kôt atõjê hõ tee ri mẽmoj tã amnhĩ pumunh kôt ra Tĩrtũm kaga kaxyw tã ã mẽ ate amnhĩ nhĩpêx anhỹr ã mẽ apumu nê mẽ apyrà nê akupỹm hkôt amnhĩ xãm tỳx nê hkaga hkêt nê.

¹⁴ Nê kêr ka mẽ tãm ri axpên nhĩpêx o ri apa. Jao axpên kôt ajamakêtkati nê ri apa nê amnhĩ to mex pix kukamã ajamaxpêr. No kot kaj mẽ anhỹr kêt nê nhỹrmã mẽ panhõ Pahi Maati hwỳr axàpir nê kuri amex nê apa hkêt nê.

¹⁵ Na hte Tĩrtũm mẽ pahto mex nê mẽmoj to mẽ pakutã nojarêt rãhã o pa. Jakamã kwa kêr ka mẽ

hkaga hkêt nê. Nê tanhmã ri ajamaxpêr punuj to ho ri apa hkêt nê. Kot ka mẽ ã amnhĩ nhĩpêx anê nhũm Kris kôt mẽ pahkwỳjaja ja hã mẽ apumu nê mẽ apyrà nê tanhmã amnhĩ tomnuj.

¹⁶ Nê kêr ka mẽ axpên kãm apijaàm kêt o ri apa hkêt nê. Nê te finat Ejau kot amnhĩ nhĩpêx pyràk o ri apa hkêt nê. Na pre Tĩrtũm ã hpijaàm kêt nê hkwyjê kamã hpijaàm kêt o pa. Nê Tĩrtũm mã hamaxpêr kêt kumrêx. Kêp Ijak kra kot wa jakamã koja nhỹrmã hipêêxà mỳr pê kêp hikukrêx nê õ pika piitã ho àrĩk pa. Hãmri nhũm hipêêxà kot ho Tĩrtũm wỳr nhũm kot ho mex kaxyw mã tã nhũm axtem nê mẽmo arĩgro hã kãm prãm xàj kot kêp mẽmoj to àrĩk mã xwỳnhta htõ Jako mã hkaga hpa. Mankwỳtre gôj kãm ãm prãm xàj kãm hkaga hpa. Jakamã nhũm Jako hpãnhã te kêp Ijak kra kot wa pyrà nê mỳr pê õ mẽmoj piitã ho àrĩk mã.

¹⁷ Gaa nhũm Ejau tee ri ã amnhĩ nhĩpêx anhỹrja mã hamaxpêr o hkaprĩ nê. Nê tee ri kãm Jako kot akupỹm kãm mẽmojta nhõr prãm kaprỳ. Nê mur nê hã hipêêxà wỳ no nhũm axte kãm mẽmoj nhõr kêt nê. Nhũm kot ho Tĩrtũm wỳr kaxyw tee ri amnhĩ to kuwỳ no nhũm kuma nê ãm kuma nê kãm ho anhỹr kêt nê.

¹⁸ Nê amnepê mã Tĩrtũm kot mẽ panhĩgêxjê mã kapêr kaxyw na prem hixêt prêk pê Sinai jarênhja wỳr akuprõ nê hparpê kuhê. Hãmri nhũm hixêt nhĩmõk ã kuwy hpôk rax kumrêx. Nê kuwy mỳr ri kakrã htyk ajêt. Nê kôk àpêr tỳx nê. Nhũm Ijaewjaja hixêt krax ã omu nê kãm maa ho htertet o kuhê. ¹⁹⁻²¹ Hãmri nhũm mẽhõ pifti kakô nhũm Tĩrtũm hixêt nê mẽ kãm kapêr nê mẽ kãm:

—E mẽ inhma. Kêr ka mẽ hixêt ã axàpir kêt nê. Kot kaj mẽ atõ hã api rỳ mẽ akrit õ hã api ka mẽ ja hã omu nê kaxyw kên rũnh kwỳ jamỳ nê ho htak o apĩ. Anê.

Hãmri nhũm mẽ piitã tee ri kuma nê kãm ma htỳx kumrêx nê amnhĩ nê kãm:

—Kwa hãmri Tĩrtũm. Axte mẽ inhmã mẽmoj jarênh kêt nê. Mojes pix mã mãn mẽ ixkaxyw tanhmã kãm akapêr to. Anê.

Jakamã nhũm Mojes Tĩrtũm mã amnhĩ jarênh nê kapêr mar kaxyw hixêtja ã api. Kãm ma nê htertet rãhã mō nê hã api. ²² Nom mẽ kãm ma ho Tĩrtũm mã amnhĩ jarênh tã mẽ papajaja na pu htem mẽ kurom paxãmnhĩx kãm amnhĩ jarênh o papa. Na pu htem kãm amnhĩ jarênh kaxyw nê hixêt prêk ã paxàpir kêt nê. Te ra mẽ pahte ma kaxkwa hwỳr õ krĩ hwỳr paxàpir nê pano ho omunh pê kãm amnhĩ jarênh pyràk. Õ krĩja mex o mex. Kamã kapêr o mẽ wrỳk xwỳnhjaja ohtô o ohtô. Na htem kamã hkĩnh rãhã ho pa ho pa.

²³ Nê õ krĩ hwỳr na hte hkra xàpir xwỳnhjaja ri pa. Nê mẽ papajaja na pu htem kãm amnhĩ jarênh kaxyw nê te kaxkwa kamã kuri pakuhê nê kãm amnhĩ jarênh pyràk o amnhĩ nhĩpêx. Te mẽ pahpê hkra kot wa pyràk jakamã mẽ pamã uma hkêt. Nhũm pre Tĩrtũm ra õ kagà kamã mẽ pakutêp amnhĩm mẽ panhĩxi hã kagà hpa. Na hte mẽmoj piitã hamãr o hkrĩ. Nê krĩja kamã amnepêm kormã Kris kot mẽ pahwỳr wrỳk kêt ri nhũm ra amnhĩ kaxyw Tĩrtũm kôt hamaxpêr mex xwỳnhjaja haxwỳja ra kamã ri pa. Ra Tĩrtũm kot mẽ ho hkra jakamã nhũm mẽ kuri ri pa ho pa. ²⁴ Nê Jejus

haxwÿja kamã pa ho pa. Na pre mẽ panê htyk nê hkamrô pikapĩrja o mẽ pahte amnhĩ tomnuj pãnhã amnhĩre. Jakamã na pu htem hkôt amnhĩ xunhwÿ nhũm mẽ pahto hkra pu mẽ paxãmnhĩx ri Tĩrtũm mã amnhĩ jarênh nê amnhĩ to hwÿr o papa.

Amnepêw na pre Tĩrtũm tee ri Kaĩ kot htõ Apew pĩr nê hkamrô pikapĩrja ã omu nê hamaxpêr o:

—Nà ã kot amnhĩ nhĩpêx anhÿr jakamã kot paj hã homnuj tÿx nê. Anê.

Tã ra hpãnhã Jejus kot mẽ panê htyk nê hkamrô pikapĩrja ã omu nê ra axtem hamaxpêr o:

—Nà ãm hãmri na Ixkraja mẽ nê ty. Jakamã mẽ kot hkôt amnhĩ xunhwÿr xwÿnhjaja kot pa Ixkra kukwak ri mẽ kot amnhĩ tomnuj mÿrapê tanhmã mẽ ho hkêt nê.

Anhÿr o mẽ pakukamã hamaxpêr. ã hamaxpêr anhÿrja mex o mex.

²⁵ Na pre Mojes Tĩrtũm nhÿ hã mẽ panhĩgêxjê mã xatã mẽ kãm Tĩrtũm kapêr jarênh o ri pa nhũm mẽ kuma nê hkôt amnhĩ nhĩpêx o pa. Tã gaa nê ra hã nohkêt pa nê akupÿm mẽ kot amnhĩ nhĩpêx tũm o awjanã nhũm Tĩrtũm tee ri ja hã mẽ omu nê mÿrapê tanhmã mẽ hipêx to. Tã nhũm Kraja kaxkwa rũm mẽ pahwÿr wrÿ nê mẽ pamã kapêr. Jakamã kwa mẽ okora kêr pu mẽ panhĩgêtjê pyrã nê mẽ pahte amnhĩ nhĩpêx tũm o paxujanãr kêt nê. Kot puj mẽ anê nhũm Tĩrtũm ja hã mẽ pahpumu nê mẽ urak nê ja hã tanhmã mẽ panhĩpêx to.

²⁶ Amnepêw Tĩrtũm kot hixêt prêk pê Sinai kamã mẽ kãm kapêrja. Na pre kapêr tÿx o pika ho àk nhũm htertet tÿx nê. Tã koja nhÿrmã axte pika ho àk nê kaxkwa ho àk nhũm wa hamê htertet tÿx kumrêx. Koja axte ho anhÿr ho pixi nê axte ho

anhÿr kêt nê. ²⁷ Tã nhÿrmã axte mẽmoj to àk ã amnhÿ jarênh jakamã koja mẽmoj to kator xwÿnhhta piitã ho àk. Nê mẽ pahte panhÿhkra ho mẽmoj nhÿpêx xwÿnhja nhÿm ho àk nhÿm htertet tÿx kãm hpigràngh pa nê hapêx. Nhÿm mẽmoj htertet nê hpigràngh kêt xwÿnh pixjaja arÿ rãhã ho rãhã. ²⁸ No Tÿrtÿm nhõ krÿ koja htertet nê hapêx kêt nê. Nê mẽ papajaja mẽ pahpê hkra jakamã te ra kuri õ krÿ kamã ri mẽ papa pyræk. Jakamã kot puj mẽ mẽ uræk nê pajapêx kêt nê. Jakamã e kwa kêr pu mẽ amnhÿ tã Tÿrtÿm mã mex o mex ã harênh nê hã pahpijaàm rãhã ho papa. Nê tanhmã amnhÿ tom-nuj to hã amnhÿ pumu nê Tÿrtÿm pumaj mẽmojta kaga kurê kumrêx. ã mẽ pahte amnhÿ nhÿpêx anhÿr o papaja na Tÿrtÿm kãm hprãm. ²⁹ Hihtÿx o hihtÿx jakamã koja mẽmoj tã akamã gryk kot kaj amex kêt o amex kêt.

13

Mê pahte Tÿrtÿm kãm hprãm xà hkôt amnhÿ nhÿpêx ã mẽ pamã karõ

Rõmãn 12.1-2; Epes 4.1-3; Korosẽ 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

¹ Nê e kwa Kris kôt ixtõ nê ixtõxjaja. Kêr pu mẽ arÿ Kris kôt pahkwÿjê ho mex o mãn axpên kôt ri papa. Nê kêr pu mẽ tanhmã pahpunuj to hã amnhÿ pumunh tã axpên to mex mã panhÿrer kêt nê. ã axpên nhÿpêx anhÿr rãhã ho papa.

² Nê amnepê mã na pre mẽmojaja nhÿhÿnh mra nê mẽ panhÿgêjtê hõ hwÿr pôj. Hãmri nhÿm mẽ omu nê htÿx axtem krÿ hõ nhõ xwÿnh ã mẽ hkamnhÿx tã no nhÿm mẽ kêp Tÿrtÿm kapêr o mẽ

wrÿk xwÿnh kwÿ na prem. Hāmri nhūm amnhī nhōrkwÿ hwÿr mē kuwÿ nhūm mē ma hkôt mra nē kuri pōj nē kutā apku. Jakamā kwa koja nhÿhÿnh krī hō rūm mēmojaja ma mē awÿr mō ka mē omu nē axāmnhīx amnhī nhōrkwÿ hwÿr mē hwÿr kurē kumrēx kē mē ari pōj. Ā mē hipêx anhÿr o apa hāmri nē nhÿrmā mē panhīgêtja pyrā nē amnhī wÿr Tīrtūm kapêr o mē wrÿk xwÿnhjê hō hwÿr japêr. Mē urāk nē ja hā mē omunh kêt tā atÿx amnhī wÿr mē awÿ nhūm ja mē amā mex o mex.

³ Nē kēr ka mē ra mē kot Jejus ā mē akwÿjê pynênh nē mē hagjênh xwÿnhjê mā ajamaxpêr rāhā ho ri apa nē mē ho ajamakêtkati hkêt nē. Te mē kajaja mē ĩhkô hā mē hagjênh xā kamā apunuj nē akrī pyrāk o mē kām ajamaxpêr o ri apa. Jao mē kamā axukapri ho mē hwÿr mra nē mē kām mēmoj nhōr o ri apa.

⁴ Nē mē kot axpên to hprōja na mex. Nom kēr ka mē amyjaja ām aprō pix tănopxar o ri apa. Nē mē anijaja mē ajaxwÿja amjên pix tănopxar o ri apa. No mē hkuprÿjê hwÿr mē mrrar xwÿnhjaja nē nhām mē kêp mē hprō ho amnhīkati xwÿnhjaja nē nhām mē kêp mē mjên o amnhīkati xwÿnhjaja koja Tīrtūm ja hā mē omu nē mē homnuj tÿx kumrēx.

⁵⁻⁶ Nē kēr ka mē akāxpore rūnh kêt ā amnhī pumu nē tee ri amnhī kukamā ajamaxpêr o akapri hkêt nē. Na pre Tīrtūm mē pamā kapêr o:

Kot paj akôt ri ixpa rāhā ho ixpa nē aa arer rÿ akaga hkêt kumrēx.

Anhÿr jakamā kot kaj mē akāxpore grire htā akapri nē apa hkêt nē. Aa Tīrtūm kot mē pahkaga hkêt ā amnhī jarênh jakamā mēmoj kot pu wem omu

nê pamã nhãm ri mẽ uma ho papa? Tĩrtũm kot mẽ pahkôt pa ho pa kênã. Jakamã na pu htem pajamaxpêr o:

Nà Pahi Maatija ra kot ixkôt pa ho pa xwýnh jakamã mẽmo kot pa hkêt ri inhmã uma ho ixpa?

Mẽmo kot kêt ri tanhmã kêp ixto?

Anhỹr o pajamaxpêr o papa. ⁷ Nê mẽ kot Kris mã mẽ ajamãr o mẽ pa xwýnh ra mẽ htyk xwýnhjaja ka mẽ arĩ mẽ kot tanhmã amnhĩ nhĩpêx to ho paja mã ajamaxpêr rãhã ho ri apa. Na prem Tĩrtũm kapêr o mẽ ajahkre mex nê. Nê tãm ri amnhĩ nhĩpêx o ri mẽ akôt pa. Nê amnhĩ kaxyw Tĩrtũm kôt pix mã hamaxpêr rãhã ty. Tã kêr ka mẽ urak nê ã amnhĩ nhĩpêx anhỹr o ri apa rãhã ty.

⁸ Nê Jejus Krisja arĩ rãhãã. Nê amnepê mã kot amnhĩ nhĩpêxja mããnên arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹ Nê kwa kêr ka mẽ Tĩrtũm kôt amnhĩ nhĩpêx rãhã ho ri apa. Na hte kapêr o hêx xwýnhjaja mẽ awýr mra nê mẽ amã:

—Amnepêm mẽ ate Tĩrtũm kot mẽ amex ã mẽ ajarênh kaxyw mẽ ate kãm mẽmo mry nhõr nê akupým hamýnh nê hkur o apa htã ra ja ho anhỹr kaga. Kwa mẽ ja ho awjanã nê axte ã amnhĩ nhĩpêx anhỹr o ri apa. Kê Tĩrtũm ja hã mẽ apumunh kôt mẽ amex ã mẽ ajarê.

Anhỹr o mẽ amã kapêr. Nom xà na hte Tĩrtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pamex ã mẽ pajarê? Xà na htem mẽmo mẽ apkur xà hkur pê amnhĩ kaxyw Jejus kôt hamaxpêr tỳx o pa? Nà na htem anhỹr kêt nê.

Na pu htem mëmoj kur kôt pamã Tĩrtũm kĩnh kêt nẽ. Kêt mẽ paxàpkur xàja mẽ panhĩ pix o hihtỳx kaxyw na. Na hte Jejus kôt mẽ pahto paxihtỳx kêt nẽ. ãm Tĩrtũm kot amarĩ kãm mẽ pajapê nẽ mëmoj to mẽ pakutã nojarêt jakamã na pu htem ja hã amnhĩ pumu nẽ amnhĩ kaxyw hkôt pajamaxpêr tỳx o papa.

¹⁰ Tĩrtũmja Jejus kot mẽ panê htyk ã omunh xà hkôt ra kot mẽ pamex ã mẽ pajarênh jakamã mo kaxyw kot pu mẽ axte kot mẽ pamex ã mẽ pajarênh kaxyw kãm mẽmo mry gõ nẽ hkwy hku? Koja mẽhõ akupỹm Tĩrtũm kapêr tũm o ujanãr jao Jejus kot nẽ htyk nẽ hkamrô pikapĩrja kaga.

¹¹ Amnepêm na pre patre maatijaja tũhã mẽ kãm mẽmo mry hpar xwỳnh hkamrô ru nẽ guhkrax kãm kuru nẽ hamỳ nẽ ma o mra nẽ Tĩrtũm nhõrkwỹ kaàkre hwỳr hitom maati hwỳr ho agjê. Tĩrtũm kot mẽ omunh nẽ axte mẽ kot amnhĩ tomnuj mã hamaxpêr kêt kaxyw. Hãmri nhũm hpãnhã í mỳ nẽ krĩ pê ho kato nẽ ma o mra nẽ nhỹri amỳm hkwyjê hkàx ã ho hxê pa. Tĩrtũm kapêr tũm kôt na prem ã amnhĩ nhĩpêx anhỹr o pa. ¹² Tã ja pyrà nẽ na prem ma krĩ pê amỳm Jejus o tẽ nẽ kupĩ nhũm hkamrô axkapĩ. Kot mẽ pahte amnhĩ tomnuj pãnhã amnhĩrer nẽ mẽ pahto mẽ pahpê Tĩrtũm kra kaxyw ã htyk nẽ hkamrô pikapĩr anẽ.

¹³ Na prem Tĩrtũm kapêr tũm gryk ã Jejus kaga nẽ pòristijê mã anẽ nhũm mẽ ma krĩ pê ho kato nẽ o tẽ nẽ kupĩ. Tã kêr pu mẽ jajê rom Jejus gryk ã mãn Tĩrtũm kapêr tũm kaga. Kwãr mẽ mãmĩ Jejus pyrà nẽ Tĩrtũm ã tanhmã mẽ pahto nẽ amnhĩ nẽ nhỹhỹm mẽ pajano. ¹⁴ Kêt jar mẽ papapxàja kêp

mê papapxà kumrêx kêt. Nê jar mê panhõ krîja kêp mê panhõ krî kumrêx kêt. Mê pamã te kot pô nhîrõnh o ixkre pix pyræk. No kêt mê panhõ krî kumrêx koja jar mê panhõ krî rom aa hapêx kêt nê. Tã tãm na pu mê kormã ma hwÿr papa kaxyw arĩ amnhĩ tã Tĩrtũm jamãr o papa.

15 Nê na htem Ijaew arĩ ohtô nê amnhĩ pãnhã Tĩrtũm mã mry hpar ho pa. Nom mê papajaja kot puj mê axte ã amnhĩ nhĩpêx anhÿr hkêt nê. Kot puj mê ãm Jesus kukwak ri Tĩrtũm mã mex o mex ã harênh rãhã ho mãn papa. Jao te mê pahte kãm hkĩnh xà nhõr pyræk o amnhĩ nhĩpêx.

16 Nê kêr pu mê arĩ axpên to mex o ri axpên kôt papa. Nê kê mēhõ kêp amrakati japêr ka ja hã omu nê amnhĩ kutã kãm anhõ mēmoj kwÿ. ã kot puj mê axpên nhĩpêx anhÿr rãhã ho ri axpên kôt papa. Kot puj mê anê nê te mê pahte Tĩrtũm mã hkĩnh xà nhõr pyræk o amnhĩ nhĩpêx. ã mê pahte amnhĩ nhĩpêx anhÿrja na mex o mex.

17 Nê kêr ka mê Kris kôt mê akrãhtũmjê kapêr ma nê mê hkôt amnhĩ nhĩpêx mex nê. Na htem Tĩrtũm mã mê ajamãr o ri mê akôt pa. Koja mê nhÿrmã mê kot tanhmã mê anhĩpêx to hã Tĩrtũm mã amnhĩ jarê. Jakamã mê kãm mê ato ajuta prãm. Tã kêr ka mê kapêr ma nê mê hkôt ri amnhĩ nhĩpêx mex o ri apa. Kêr kê mê amnhĩ tã mê apumu nê hkĩnh nê. No kot kaj mê ama nê ãm mê ama nhũm mê tee ri amnhĩ tã mê apumu nê hkaprĩ nê. Jao tee ri kot tanhmã mê ato ajuta mex to hkukamã hamaxpêr.

18 Nê kwa kêr ka mê ixto Tĩrtũm wÿr rãhã ho apa. Inhmã Tĩrtũm noo mã tanhmã amnhĩ tomnuj to

hprãm kêt. Æm inhmã amnhĩ to mex pix o ri ixpa hprãm.

¹⁹ Nê kêr ka mẽ ixto awỳ kê tokyx akupỹm mẽ awỳr inhmẽ. Na pa ra inhmã mẽ apumunh prãm tỳx nẽ.

Kagà nhĩpêx xwỳnh kot tanhmã mẽ ho Tĩrtũm wỳr to hã harẽnh

Epes 3.14-19; Piripos 1.0-11; Wam Tesarõn 3.9-13, 5.23; Sikũn Tesarõn 1.11-12, 2.16-17

²⁰ Nê mẽ panhõ Pahihti Jejus Krisja na hte mẽ panhĩpêx o te ôwêhti jamãr xwỳnh kot hkrit jamãr pyræk o pa. Jakamã kêp mẽ pajamãr xwỳnh maati mex na. Na pre mẽ panê ty nhũm Tĩrtũm akupỹm mẽ pamã ho htĩr nẽ mẽ pamã harẽnh o:

—E ra Ixkra kot mẽ anê htyk jakamã kêr ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nẽ nhỹrmã ty pa akupỹm mẽ ato mẽ atĩr ka mẽ ixri atĩr tũm nẽ apa ho apa. Anẽ.

Tĩrtũm kêp mẽ pahto mẽ pajamakêtkati nẽ ri mẽ papa xwỳnh na. ²¹ Tã na pa hte tanhmã mẽ ato hwỳr to ho ixpa nẽ mẽ ato hwỳr o:

—Pa Tĩrtũm. E kwa tanhmã ixkwỳjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nê mẽ kãm tãm amnhĩ nhĩpêx o pa hprãm. Nê kê Jejus haxwỳja tanhmã mẽ ho mex to kê mẽ war amã hprãm xã hkôt pix mã war amã tanhmã ri amnhĩ nhĩpêx to ho pa. Anẽ.

E kêr pu mẽ arĩ Jejus Kris mã mex o mex ã harẽnh rãhã ho papa.

Kagà jatur xà kamã mẽmoj jarẽnh

²² E Kris kôt ixkràmnhwýjaja. Nà na pa ã mẽ amã kagà nhĩpêx anê. Jejus kôt mẽ ato mẽ axihtỳx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mẽ kamã harê nê mar tỳx nê hkôt amnhĩ nhĩpêx mex o ri apa.

²³ Nê mãn ka mẽ ra Ximotre jarênh mar japêr. Na pre Kris ã mẽ hagjênh xà kamã hkrĩ hã apkati xohtô nê. Tã nhũm xep mẽ ra kator. Tã koja kormã mẽ awỳr inhmõr xwỳj ri man ixwỳr mō nê hpôx japêr kot paj ma amnhĩ kôt mẽ awỳr o mō ka mẽ omu.

²⁴ Nê kêr ka mẽ kot Kris mã mẽ ajamãr xwỳnhjê mã ijarê. Nê atar Tĩrtũm krajê piitã mẽ kãm ijarê.

Nê ota jar Tĩrtũm kra hkwỳja piitã mẽ awỳr hpêr mẽ.

²⁵ E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Nã hapêx.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files
dated 29 Jan 2022

383a4e22-34cd-505f-9cc2-2f9921e7aa9f